


**IA. SADOLETI
DE LIBERIS
RECTE
INSTITUENDIS,
LIBER**

Jacopo Sadoletto



Hieronymi Calandrini eiusq; fratrum
nec non Amicorum.

M



IAC SADO

LETI AD GVLI

ELMVM BELLAIVM

Langeum, De liberis rectè in=
stituendis Liber.

BIBLIOTECA M.
ROMA
VITTORIO EMAN.



VRIPIDIS est, in An-
dromacha opinor, nō tam
formam foeminae, q̃ uirtu-
tes esse quæ delectent cō-
iugem. Te uerò Guliel-
me Bellai, optime amico-

rum omnium, quanta oportet affici uolu-
ptate: qui eam uxorem nuper duxeris, cui-
us ad egregias animi uirtutes atque dotes
species ac forma adiuncta sit, digna electis-
simis moribus: quos habuit qd̃ illa unde
disceret, nata in familia nobilissima, & in
eis educta quotidianę uitæ consuetudini-
bus, quę splendorē & elegantia optimi ge-
neris apprime redolerēt. Sed tibi certē con-
tiguit ex tui animi sententia, ut talem habe-
res, qualem semper optasti. Nam cum etiā
tu antiqua nobilitate, & claris maioribus
procreatus, plura, ac multō præstantiora

Forma
tuoque
iuncta
debet.

A 2 ornamen

Scribitur A. N. in Secundo deconomico & nec uirtutes
nec aui magnitudo tantum ualeat ut quales
tandem quæcum modestia in rebus & boni mor

ornamenta tibi ex uirtute acquisiueris, ijs
 quæ à natura & à fortuna multa ac magna
 accepisti. Sanè fuit æquū, ut sociam thori,
 atq; uitæ eam tibi adiungeres, cuius inge-
 niū & uirtus tuis humanissimis moribus
 responderet. Maximè autē in hoc laudan-
 da F R A N C I S C I Regis nostri sapientia
 est, & consilium summo principe dignum,
 qui quod cæteri ferè in equis & canibus,
 ipse præcipue in uiris facit, ut prouidentia
 omnem adhibeat, quò ex spectatis utrinq;
 generibus electi in hoc sanctum fœdus ma-
 trimoniū conueniant, ut ex bonis parenti-
 bus nascatur progenies, quæ postea & Re-
 gi, & patriæ possit esse utilis. Etsi in eo
 præterea necessaria esse disciplina quædam
 uidetur, quæadmodum domi ali atq; insti-
 tui debeant pueri atq; adolescentes. Quo
 de genere nos, cum nuper nescio quid con-
 scripsissemus, uiam patribus, & rationem
 ostendere conati, qua bene atq; ingenuè eru-
 dire liberos possent, statuimus tibi deferre
 hoc munus, quò futurū esset monumen-
 tum nostri in te amoris: & si tu minime o-
 mnium huius quidem præceptionis indi-
 geas. Quis enim est, de instituendis recte li-
 beris

*Fortes creantur fortibus & bonis
 Est in Iuuenas Est in equis Primum
 Virtus nec imbellem feroces*

beris scribere aliquid uolens, qui nō plura
 & potiora domi uestræ huiusce generis do-
 cumenta reperiāt, quā ipse ad instruendum
 alios possit afferre: In quo sepe solitus sum
 mirari parentis uestri felicitatem, an uirtu-
 tem, an uerius dicā utrunq; : qui cū plures
 sustulerit, alueritq; liberos, sic eos omneis
 equaliter artibus optimis, & præclarissimis
 moribus expoliuit, ut cuncti ex eadē quasi
 forma humanitatis, simul ac dignitatis con-
 flati, & quodam modo excusi esse nidean-
 tur. Sed tamen non inacceptū tibi fore hoc
 animi mei studiū sum arbitratus, quod &
 iucundum amicitia, & opportunum recēs-
 tuum cōiugium facturum sit: E' quo Deū
 immortalem precari nō desino, ut te gigne-
 re prolem eam cōtingat, quæ paternam &
 auitam uirtutis imaginem in omni posteri-
 tate possit prorogare. Verūm ut ad ipsum
 iam sermonem de liberis recte instituendis
 ueniamus : Cum sederem olim in meridie
 domi ociosus, nescio quid tum de meis stu-
 dijs cogitans, accessit ad me Paulus Sado-
 lectus, adolescēs sanè quā deditus studijs
 honestissimis, quē ego fratris filiū, traditū
 mihi à patre, in filij educans loco, omnibus

*Enitendum
 uirtutis
 iunctis mor-
 & bonas
 simul con-
 tur adole-
 tuli.*

*Paulus
 doctus*

cum instituere contendebam & literis bonis, & moribus. Quem tamen laborē leuē mihi & iucundum faciebat, cum summum eius ingenium, tum uoluntas natura & cōsuetudine iam ad omnem optimam partē, rationemq̃ propensa. Is tunc cum introisset ad me aliquantum tēporius q̃ solebat, (erat enim tempus diei certum constitutū, quo audiebat quotidie de me Aristotelis Ethica) Sic eū interrogare ingressus sum. I A C O B V S. Quid est Paule quod te huc tam maturē? num te fefellit hora? aut aliud quid fortē apportas noui? P A V L V S. Nihil quicq̃ magnoperē Patruē mi, aut si nō tam huius quæ in corpore sit, q̃ sanctioris in animo generationis & meę pietatis erga te propriū nomen quæritur, longē iustius mi Pater. Sed ego ad te accessi prudens aliquantō maturius, non ipse aliquid apportans noui, sed expectans potius à te. I A C. Quid istuc quod expectas? age, exprome, nihil enim recto studio tuo abnuet unq̃ uoluntas mea. P A V. Scio ego istuc, etiam te tacente, mi Pater; facile enim mihi declarat res ipsa. Sed modò percunctanti mihi cum cubicularius dixisset ociū tibi esse, non in-

opporu

opportuniū sum arbitratus petere à te, ut de instituenda recte adoleſcētia ea mihi in unū praecepta componeres, quæ ſparſim & intercife ſape edere es ſolitus : cupio enim habere mecum tanq̃ commentariū præceptionum huiusmodi, è quo ipſe me conformare ad uirtutem poſſim, ut talis ſiam, qualem tu me eſſe uiſ. Sed hoc niſi moleſtū eſt, & ſi non aliud quid anteuertendum putas. I A. Mihi moleſtū? aut aliud quid anteuortam? an eſt quicquàm omniū rerum qđ malim, quàm te & optimū, & doctiſſimū eſſe? Sic enim puto te hoc quærere, ut quod & ad bonos mores attinet, & qđ ad literas bonas, totū tibi id à me explicari cū pias. P A V. Iſtud ipſum eſt quod ego cupio. I A. Atqui Paule ſi rē tractare, & exequi ordine ſuo uolumus, ab ipſa pueritia exordiendū eſt. Nemo enim inſtitui recte poteſt adoleſcens, qui nequiter fuerit educ-
tus puer : nā ut radix indolē ingeniumq̃ arboris, ſic bene moratā & compoſitā adoleſcentiam pueritia ipſa producit. Hoc primum tempus ætatis, quod imprimis lubricum eſt, atq̃ anceps, minimè eſt omnium legibus, hiſ quibus nūc utimur, animadu-

qui ali
 tunc non
 minimum
 alit nec
 est.

sum atq; tractatū, neq; adhibita cura, ut id publice excolatur, cum maxime in eo uno ciuium boni mores, & ciuitatum salus constituta sit. De actionibus et cōtrouerſijs inter sese ciuiū accuratè iura constituta sunt: in quo autem fermè sunt omnia, de genere uitæ eligendo, de educatione liberorū, de officio parentum, de uirtute, de moribus, quas quēq; sequi artes, & quas reſcere cōueniat, mirum silentium est, præterq; si qua sunt Pontificio iure ad doctrinam uirtutis ac religionis præcepta iuuentuti, uel generi potius certo, ijs uidelicet qui sacris initiati sunt, nec tamen ea ordinatim, neque à pueris, ut potius innuisse præclara quedā, q; diligēter exposuisse uideātur. Græci diligentiores: nec tam in agēdo præcipiēdoq; ea quæ sunt uirtutis: (in hac enim laude nulli omnino nationi neq; generi prisca illi maiores nostri concessere: quod ueterū rerum monumēta perspicuè indicant) quàm in conseruando & tradēdo posteris ea quæ optime essent statuta. Cū apud nos & XII. tabularum lex totius æquitatis ac iuris seminariū, & uetera omnia plebisscita, S. consulta, magistratuū edicta, nouorum iuris-

consulta

consultorum infinita quadam ubertate & redundantia iam diu offusa & oblitterata sint. At me hercule apud Græcos nō modo Draconis ac Solonis ueteres quā plurimæ leges, uerumetiam Lycurgi rhetræ, ut illi appellant, cōseruatae perquā diligēter sunt. Quod eō est miserabilius, quod ille bonam partem legum suarum, non in tabulis, sed in mentibus atq; animis ciuiū suorum inscripserat, ut usu, non scriptura perdiscerentur. Redeo ad Solonem, cuius legibus sic ad unguē & propē curiosē omnia perscripta sunt, quod ad educationem quidem attinet puerorū, nihil ut omnino, qd ad eā spectet rationē, omissum sit. Est enim ille quæcunq; etiā minima tenuissimē persecutus, qua de gymnasijs, qua de pædagogis, quota diei hora, quosq; ad ludī magistrōs ueniendū esset, quo etiā uestitu & comitatu incedendū; ac ne illud quidem prætermisim, ut cum procederent in publico, intra palliū manus continere deberent. His, ut mea opinio & coniectura fert, nequaquā indiligentius maiores nostros illos ueteres accurauisse, quæ ad disciplinam iuuentutis facerent, existimandū est; nam &

Solonis
de pueris
candis

illæ in campo quotidianæ exercitationes
hoc declarât, & tempus militiæ præscriptū,
& gerendi mutandiq; uestitus diuīsa tem=
pora, cū à prætexta ad togam puram, inde
ad togam uirilem transitus esset, quæq; hu=
iuscemodi multa, nō tam ex antiquis legi=
bus, quarū scriptura interīnt, quā ex an=
nālium monumētis & rerum gestarum hi=
storia seligere licet: quibus promptū est co=
gnoscerē, ex illis disciplinæ bonæ semini=
bus, atq; illa tanquam noualium agrorum,
sic recentium animorum diligēte cultura,
eas uirtutum & morū optimorum fruges
fuisse effusas, quibus prisca ætas redunda=
uit. Nos ista cōtemnimus scilicet, curamq;
penitus liberorū parētum permittimus ar=
bitrio. Ast quotusquisq; est q̄ sapiat recte?
& aut liberos studeat effici quā optimos,
aut etiam id si uelit, nouerit tamē modum
& uiam instituēdi: non ne ignaris plerūq;
hominum mentibus lumen à legibus præ=
ferri oportuit, quo & uolentes docerētur,
& cogerentur inuiti? Nunc in hac pertur=
batione uitæ atq; morū, mihi uenit in men=
tem canticum illud quod usurpatum olim
apud ueteres, cū esset laus iam priscorum
tempo

temporū unā cum Rep. & libertate Pop. Rom. profligata, nostra ætate instaurari uideo. PAV. Quod nam id est? I A. Aetas parentū peior auis, tulit nos nequiores, mox daturos progeniē uitiosiore. PAV. Iam memini Horatianum; I A. Iam illud maximum uinculum in legibus Solonis, ad continendos patres in officio, atq; uti liberorū curam secundum præscriptum legis gererent. Quandoquidem, si prætermisissent, & uel avaritiā uel scelere compulsi uiolassent sententiā legis in educandis atq; instituentis liberis suis, ppositæ erāt poenæ, & grauis iudiciū metus, ad qd̄ eos adduci à quolibet uolente, & nomē deferri illiusmodi patris licebat; legitima quoq; illis adempta, quæ naturę lege quadam atq; humanitatis patri debeat filius; nā neq; colere illum talem cogeatur, nec reuereri, nec sustentare suis opibus egentem aut debilem. Deniq; qui parentis boni officio in filium usus nō esset, in eū noluit lex ullum à filio pietatis & grati animi officium sua autoritate extarre. Illud unum excepit, sanē quā humanē, ut defuncto eiusmodi patri, iusta tamen filius faceret; cū in eo non ullum cōmodum

ageretur

Soloni

Soloni
contra
tes
filios
instituent

ageretur parentis. Sed illa pietas naturæ, ipsiq; humanitati debita redderetur. Sed quorsum hæc: ut intelligas Paule magnam huiusce primæ ætatis curā rationemq; ducendam esse à sapientissimis fuisse iudicatum: ut quæ uestibulū quodam modo uitæ sit, totamq; annorum cōsequentium quasi formam quandam & ædificationem præferat. PAV. Sanè persuasum mihi habeo optimo hæc ab illis cōsilio instituta fuisse, quæ & rationem bonam in sese habeant, & egregiam cæteris omnibus utilitatē afferre uideantur: quò etiam magis cupio explicari mihi ea à te, & sub unum quasi aspectum pueritiam cum adolescentiā constitui: non enim mihi hoc soli, sed pluribus fortasse erit emolumēto. IAC. Benè ominaris Paule, itaq; est faciendū: & quoniam omnium rerum bonarū principia ab Deo immortali ducenda sunt, ambo eum uenerantes obsecremus, ut uolens & propitius adsit nobis, sibiq; grata, & reliquis utilia iubeat à nobis pferri. PAV. Sic agamus. IAC. Est igitur huius nostræ præceptionis ratio in duas diuisa partes. Altera in moribus pars, altera in literis tota cōsistit. Mores pertinent eò,

nam sapien
tiam
ammi

quædam in
moribus

et composit

ymatos moribus

simillimos, esse

nam id ideo illis

inditum est à

& malo adolēcentes nullas scire uis ut quod
omnia scire male moratos, malisq;
qui & si multa. Sciunt
Græcis nomen? Sunt

ut quodcūq; fiet dicetur ue, habeat in sese
 modestiam quandam, ordinemq; agendi ap-
 ptum & conuenientē, in quo splendeat de-
 corum illud, quod non animos modò pru-
 dentium, sed imperitorū etiam oculos dele-
 ctet, moueatq; necessariò in admirationem
 sui. Literarum uerò & artium earū, quas
 uocamus optimas, ea uis est, eaq; natura, ut
 quod caput in nobis est, atq; adeo qd' uerè
 & propriè sumus ipsi, id tanquā inchoatū
 & rude acceptum à natura, ad summā ipsæ
 dignitatem perpoliant, exprimantq; in eo
 formam diuinæ illi similem. PAV. Par est
 præclarū mediūsfidius mi Pater, si quidem
 altera ex parte facit ut similes Deo simus,
 ex altera ut uideamur. IAC. Atqui Paule
 hoc tibi imprimis & maxime animaduer-
 tendum est, hoc penitus tenendū & cōpre-
 hendendum, non esse nos quod oculis cer-
 nitur hoc corpus, & hanc compactā ex os-
 sibus & neruis molem carnibus cōtectam,
 cute uestitam: neq; hunc uultum nostri pri-
 mam imaginem, in quo notare signa inte-
 riorum sensuum solemus, atq; animū penè
 ipsum in eo noscere. Sed quo sapimus in-
 tus, & cogitamus, unde omnis est nobis ra-

*Oculus in
 sensibilibus
 magnus in p
 animalibus
 tio atq;
 uerus
 natus
 oculo in
 animus in habit*

tio atq; cōsiliū, hoc nos homines esse, factum ipsum quidem ad imaginē effectoris sui Dei. Sed obscurum per se & languens, nisi scientiæ & literarum lumen accendat. Iam quod dicebamus rectam educationem in literas & in mores distributam esse, rursus alia diuisione secādū est, quatenus quidē pertinet ad mores : nam literæ continenti ferē cursu gradus habent suos, quorū ex alio ad alium transitus fiat; mores diuisi nec ratione solum, uerum etiam tempore.

P A V. Quo pacto? I A C. Non est eorū unum genus, neq; simplex tractatio: Aliud enim in moribus pfectū est, quod aliena cura & ratione imprimitur in nobis. Aliud quod à domestica mente atq; cōsilio nobis ipsi cōsciscimus.

P A V. Quid amborum ut diuisa tempora sint, non' ne una ac eadē est ratio?

I A C. Quorum alterum cū ratione est, alterum nullam continet rationem, non potest amborum una atq; eadem ratio esse.

P A V. Cupio mihi hoc fieri planius. I A C. Conabor equidē, quod melius ut possim, simile tibi proponā, in quo intueri imaginē meæ rationis possis. Dic ergo tu mihi, uidistin' Romæ Apollinē illū, qui in xysto positus

ad hortos

ad hortos Vaticanos, anteriore illam ambulationem, & omnem gyrum uiridiorum exornat, cui proximum est Laocoontis simulacrum, ea qua scimus omnes artis præstantia & nobilitate? PAV. Amplum illud signum dicis & procerum, facie augusta hominis plus paulo quam adolescētis? quod tanquam sagittā emisit ex arcu, diducto gestu brachiorum, uidetur expectare, an quod intentum fuit telum eò perueniat: in quo lenes illi conatus motusque corporis, atque oris eximia pulchritudo, summam & opificis artem, & operis gloriam demonstrant. IA. Illud ipsum. PAV. Et uidi sæpenumero, & contemplatus sum. IA. Quæro ergo ex te, si ipse Iouis Apollo filius illa prorsus facie sit, ab eoque in lapidē omnia descripta sint, oris, & corporis liniamenta, gressus quoque & motus, nec non uoces, sonique uerborum, ita ut nihil fieri possit similis, mentis uero & cogitationis nihil omnino intus sit, dixeris? ne tu unā eandemque rationē Apollinis in Deo & in marmore esse? PAV. Agnosco *ὁμώνυμον*. & simul uenit in mentē imaginis illius, quā Nube caua tenuē sine uiribus umbrā in faciem Aeneæ finxit, nō

tam Iuno suis manibus, q̃ carmine maximus omniũ Poëta. I A C. Optimum isthuc quidẽ, & ad id quod dicebamus etiã appositius; cuius ego in memoriam si rediissem, non habuissem necesse certare cũ Polycleto, & tãquàm addere conari quæ ipsius statuariæ arti deessent ornãmẽta; cum multò præstantior ille Polycletus simulacrum cuiusmodi quærebat, omnibus absolutũ & perfectum artis ornãmẽtis, nobis effinxisset, sed simulacrum duntaxat, hoc est quod non mente & uoluntate sua, sed imitatione quadã solum moueatur; quod ego te arbitror non eiusdem modi, neq; unius generis cũ uero ipso Aenea existimaturũ esse. P A V. Minime uerò existimem; iamq; intueri mihi uideor, quæ sit utriusq; moris distantia, alter enim extrinsecus inductus est, & aliena ratione impressus, suæ expers rationis, tãquàm inanimatus mos, uerĩ moris simulacrũ, & quẽdam quasi penicillo in aliena tabula ducta similitudo. Alter quẽ sua & ppria ratio gignit formatq; cõsultò istud agens, gnara muneris sui atq; officij, eademq; continet, quod in priore illo genere non accidit; ita hoc ueritas est, illud ueritatis

ritatis adumbratio. I A. Nunc mihi tu sapi-
 sis, & ueram insilisti rationem, non enim in
 puero, neque homine pueri simili, qui sit mē-
 tis suę & cōsiliij inops, illa extrinsecus indu-
 cta moris imitatio, aut certi ordinis uim,
 aut uirtutis proprium nomen habet. PAV.
 Assentior. IAC. Quin & uocabulis quoque
 ac nominibus rem distinctam esse uideo,
 quod extraneum illum morē disciplinam
 uocamus, proprium autē & nostrum, uir-
 tutem. PAV. Quid ita? I A. Disciplina est,
 assuescere ad alienę uirtutis imperium; uir-
 tus, ad suę. PAV. Iam intelligo. Sed quid
 tandem isto more opus, ac non sua potius
 ratio ad informandum optimis moribus
 hominem in unoquoque expectatur? I A.
 Rem iacis Paule difficilem cogniti, iuue-
 nibus presertim, quos nondū dies, & usus,
 & rerum multa cognitio edocuit, quanta
 sit consuetudinis, & quā propē inelucta-
 bilis uis, quo etiam non conuenit, neque pos-
 test cadere in etatem istā exacta illa & sub-
 tilis uirtutis notio, quam etiā senecta æta-
 te qui consequuntur, beati iure appellan-
 tur. Sed uobis pueris uel etiam adolescen-
 tibus sciētię & cognitionis loco persuasio

quædam tradenda est, ut credatis & pareatis maioribus natu, quos tamen existimatione hominum probari intelligitis: nihil enim in laude hominum, bonaq; opinione uersari diu potest, qd' abhorreat ab æquo atq; uero. Quantum autem afferat ad uirtutem consuetudo, uel ex eo patet, quod quæ de uirtute philosophia pertractat, ea non à consilio, neq; à scientia, sed ex more ipso appellata est moralis: non enim magis corpus tenerum in membris manu fingitur, atq; componitur, quàm animus purus atq; recens in eum discedit morem, in quo instituitur. Quemadmodum enim in stirpibus, sic in hominum animis, q̃ diu molles hi sunt, atque tractabiles, quæuis facile inducitur forma: quæ si postea usu & die callum obduxerit, fit propè immutabilis. Cum autem illud incōmode natura paratum esse uideatur, ut tantò ante in animis nostris cupiditates rationem anteueniant, omni ope curandum est, ut extraneæ interea cogantur obedire rationi, dum sua & domestica aduentet ratio, cuius tanquã legitimæ dominæ imperia libentius deinde exequatur: nam si quoad illa abest, nullius


cura

cura coercitæ, regnum sibi in animo vindicare conatæ fuerint, & quæ libuerit omnia ad uoluntatem gerere, ne frustra post reclamabit, & aduersus illas necquicquam contendet ratio. Ac ut tibi, quanquam adhuc penè puero (annum enim modò ætatis unde uigesimum attigisti) aliquid tamè aperiam de opere ipso, consilioq; naturæ, quando studium me tuum & ingenij bonitas inuitat. Sic habeto, duas in homine esse animi partes, dissimiles natura inter se, & fermè repugnantes: unam rationis, alteram cupiditatis; harum partium ratio perspicax ex sese est, & luminis particeps, mētisq; habet oculum cernentem clarissimè atq; acutissimè omnia: cæca, & luminis penitus expers est cupiditas. Porro harum partium utriq; consiliarij sui adsunt bini; in suadendo unus, in dissuadendo alter. Rationi quidem ipsi atq; menti, honestum & turpe; Cupiditati, iucundum & molestum. Hi cuncti munero sex, cum contubernales sint, & in unis cōmorentur ædibus, si non consentiant & congruant inter se, sed sint turbulenti atq; discordes, quas tu ibi rixas, atque pognas, quos perturbationum mo-

tus, quantos fluctus seditionum inesse putas? cū aut tanquā turpe repellit ratio, quod sibi iucundum cupiditas adsciscit: aut cupiditati molestum est, quod ratio iudicat honestum: clamores intus assidui scilicet, tumultus, praelia. Quæ est igitur uera ratio bene uiuendi? hæc nimirum, ut sese exæquet cupiditas, & componat rationi, suumq; iucundum cum illius honesto, & cum turpi molestum coagmentet, & construat: quod assuescendo maxime, & agendo, cōmode fit: nihil enim tam iucundum, quā illud in quo assueueris, esse potest: hoc tu in tuis sodalibus ac socijs, nec nō in eis locis in quibus es alitus, studijsq; quæ pertractas facili per te potes Paule existimare, à quibus si quis te auellat, cōuertatq; ad familiaritates alias, & ad alia studia, moleste accipias, quod insolitū & inusitatum morem odiosum ducas: ad consuetum uerò cum uoluptate delabare. Quod tantum habet consuetudo & incōsuetudo uirium, ut altera effectrix iucūdi sit, molesti altera. Cū itaq; se sic habeat res, contendendum est omni studio parentibus, ut liberos à teneris recte doceant assuescere. Quanquā

enim

enim mos iste aliena cura impressus, non uera uirtus est, sed simulacrum imitationis uirtutis: tamen, quæadmodum de Pygmalionis muliebri statua in fabulis traditum est, processu temporis euenit, ut Deorum aliquo beneficio, in spiritum & uitam uerget uirtutis trāseat, PAV. Ni te à primo aliud percontatus essem, libenter paterer te hunc diem totum in his sermonibus ponere: ita cum perpulchra sunt ista quæ narras, tum mihi quidem uehementer iucunda, IAC. Atqui iucundiora multò tibi erunt Paule, cum re ipsa experieris ita esse, & quæ nunc auribus & cogitatione tua concipis, etiam usu intelligentiaque percipies, à quibus tamen ingenium tuum iam propius abest, quàm ætas: finxit enim te natura ad studia uirtutis aptum. Cura etiam accessit patris tui primùm, deinde nostra. Proinde iactis præclare adolescentiæ tuæ fundamentis, tua reliqua est cōtentio, ut spei laborique nostro, aliorum quoque expectationi, quæ multa de te excitata est, studio & diligentia & omni uirtute respondeas. PAV. Incensus amore sum mi Pater, cum sponte mea, tum tuis imprimis monitis & hortationibus



incitatus, ac magis etiam aliquantum, postquam sum à te in Græcæ linguæ cognitionem, & philosophiæ studia inductus, ex quibus quidē dici non potest, quot & quāta ad animum meum perueniant uoluptates. I A. Maeste uirtute, taleis enim animos haud est difficile recte instituere, tanquam autem si omnes cæteri eodem animo sint, sic nos ad educationem pueritiæ prius, ac deinceps adolescentiæ aggrediamur. P A V. Quid si non sint eodem pater, & naturam difficilem, minusq; aptam afferant? I A C. Meministi, opinor, quod à tuo Poëta de labore est dictum. P A V. Qua ille labore improbo uinci omnia affirmat, id fortasse dicis. I A C. Dico enim uero; uerum & illud quoq; quod in cōmuni prouerbio fertur, usum fieri alteram naturam. P A V. Fertur quidē, atq; imprimis. I A. Veruntamen sic habeto, si natura minus idonea sit, posse quidem euinci labore atque industria, ut is quicumq; ille fuerit, sub disciplinam bonā datus, minus incōmodus euadat, nulla insigni re ad turpitudinem notatus; præclaram autem illam speciem, decusq; eximiae uirtutis, nemo potest omnino sine initijs

naturæ

naturæ, & naturalibus quasi seminibus acquirere. Quæ cū ita sint, nobisq; id optandum sit in puero, in quo naturæ est potestas, non nostra, ingenium bonum uidelicet, quid obstat ut nō id optemus quod sit commodissimum, quod item de genere, & fortuna, & cōditione eius quem instituturi sumus est dicendum, ut sit honesto genere, bonis parentibus, locuplete familia, legitimo coniugio procreatus: non quod cæteris, quibus cuncta ista non adsunt, sit interdicta ad uirtutem uia: sed quoniam his certè qui à talibus principijs proficiuntur, magis expedita sit & planior. Prudenter enim Græcus Poëta, cum crepido generis non bene statuta sit, fermè progeniem innotatam prædicat sequi: & re uera illud altum & fidens & liberum in animo, contrahat sese & minus audeat necesse est, cum est generis sui probris in parentibus ipsis notatum. Nato igitur puero, nā quoad materna aluo continetur infans, & si quædam de exercitatione corporum, ac de quotidiani uictus disciplina matribus præcipi non inutilia possunt, tamen quoniam uentrem non omnes æqualiter ferunt, suntq; aliæ

alijs magis imbecilles, naturæ illius temporis sit cura potius, quàm patris. Natū quidem infantem curare p̄tinus debet pater, ut uberibus mater præcipue suis alat, & propter cognationem sanguinis, & quod ea res non mediocre uínculum adiungit amori; in quo enim plus laboratur, id cum perfectum fuerit, plus etiã diligitur. Verum si aliquo casu nutritrix fuerit adhibenda, deligere oportet unam, quæ sit moribus casta, ingenio prouidens: ut enim affici animum etiã nostrum, nō corpus solum, eis cibis cernimus, quæ à nobis quotidie sumuntur: sic lac ex eo corpore haustū, quod temperato regitur animo, animi ipsas illas qualitates in infantis naturam non minimum defert. Prouidere autem oportet, ne aut asperior in puero tractando nutritrix sit, ne' ue rursus quàm fuerit æquū, blandior: obrepit enim mos ex illo usu nō quotidianò solum, sed singularum penè horarum & punctorum etiã temporis, in naturā pueri, ut uel asperitate p̄territus demittat animum, atq; illiberalem quandam timiditatē cōtrahat: uel si blandimentis nimijs fuerit corruptus, nō queat deinde diutius in una

uolun

uoluntate consistere. Sed cum omnes ipso initio uitæ protinus nati ad fletum & uagitum simus, quasi præfagiente natura fortunam humanæ conditionis, quæ miseriarum plena est, non dubium est per oculos & aures infantium, tanquæ rudes rerum omnium, & penitus insuetos, sensationes adlabi ad animum etiam in somnis, quæ eum concutiant & terreant: quod, ut iam diximus, omne inuisitatum ferme molestum accidit, atquæ inde illis assidui fletus excitentur: cui rei remedium est assidua uectatio, & nutricû cantus, atquæ ut in uultibus & in affatibus familiarium infans assuescat. Ac uectatio quidem maximè in omnem partem est salubris: nam & confirmat corpus, & animum illis terriaculamentis liberat: motu enim externo interiorum illum motum, umbratilemquæ uincente ac dissipante, sensationum impulsiones illæ hebetantur: ob eamquæ causam & cunæ repertæ sunt, quasi natura ipsa cõmonstrante quid conueniat agi, & gestatio in ulnis puerorum assidua. Quare danda opera est, quoad eius fieri potest, ut quæ pueros foeminae alunt, habitent tanquàm semper nauigantes, Cantus uerò eam uim habet, ut

non modò turbatos sedet animos, sed sæpe etiam furentes, sicut in Corybantibus fit manifestū. Iam cū ad id ætatis fuerit uentum, ut puer concipere iam uerba, & auscultare attentius loquētium sermones incipiat, tunc maxime patrē attendere oportet, & circūspicere familiæ disciplinam, ne quod turpe uerbū, aut impium erga Deū ad aures pueri allabatur: ne uel quis gestus obscœnior in oculos incurrat. Ac matris tum quidem etiā præcipua est curatio, illi enim in sinu, atq; in uultu præcipue hæret infans, ingrediq; ab ea & fari discit. Quapropter ducere eum ipsa, ac gestare debet, ad templa, ad res diuinas, ad familiariū matronarum colloquia atq; conspectus, ut cognatos affinesq; diligere iam puer, & eos discernere, atq; distinguere non de facie solum, sed ipsis nominibus queat: nec eum tamen ullam in domum introduxerit, in qua non casta, & grauis sit disciplina, undique enim tanquā à locis circumcirca salubribus salutares auræ, sic ab integris & sanctis ex omni parte moribus, afflatus bonæ disciplinæ in animum pueri influendus est. Procedunt anni, fitq; indies puer & animo

& corpore uegetior, ut tanquàm idoneo in solo iam feri aliquid possit; nullumq; semē est aut prius aut præstātius, nec quod uberior ex sese fruges, aut utiliores ad beatam uitam efferat, quàm inijcere illi in intimos animi sensus & nomen, & cogitationē præpotentis Dei: ut eum incipiat & amare, & reuereri, à quo sibi omnia dari atq; donari quotidie audiat, quod cōmune iam est utriusq; parentis officium: quē enim ipsos uiderit adorantes, & cui agentes pro benefactis gratias, eiusq; opem atq; auxiliū in rebus dubijs implorantes supplicii uultu atq; gestu, de eo iam ipse eam opinionē cōcipiet, tanquàm quiddam sit, hominum, quos ipse nouit, & potestate & natura multò maius; præsertim si, ut fit, cūm quid puer appetiuerit quod sibi flagitet dari, aut bullam, aut prætextam, aut quippiam simile, quod ad ingenuitatis & familiaris nobilitatis pertineat cultum, quotienscunq; dabitur, totiens Dei illud esse donū atq; munus puero inculcetur, ut de principio amare condiscat, quē necesse est etiam timere, non timore illo seruili, is enim neq; gratus Deo esse potest, neq; ad innocentiam, ue-

ramq;

ramq; uirtutē quicquā proficit. Sed ipso eo, qui cum amore ita cōiunctus est, ut nequeat auelli: De quo diuinitus scriptū est in sacris literis: Timorem domini omnis sapientiæ initium esse. Et uerē cuius in animo infederit iste Dei siue amor, seu timor, quando utroq; in utroq; mixtū & copulatum esse dicimus, de eo nūquā extimescendum est, quod ad malas uitæ rationes, quisquis ille est, penitus se dedat: qđ in pueropotissimum conandum est, ut hæc bona radix ad beatam uitā fruticans, in eius animo quā maturissime, & quā solidissime pangatur, dum uacuis locus est, neq; alienis aut etiam contrarijs animi conceptionibus propter nouitatē naturæ, atq; ortus, mens etiā nunc occupata: cū quæ primo & spatiosè deposita sunt semina firmiter cōprehēdunt, nec stirpium adhuc multarum sylua in angustum coguntur. Atq; humana quidem eiusmodi sunt, ut errare & labi quandoq; sit necesse: uerūtamen si ista pietatis erga Deum puræq; religionis tanq; arbor intus adoleuerit, sicut inutiles herbas umbrosis in locis nasci fortasse & uirere contingit aliquādiu, maturescere quidē

dem cer

dem certe, & frugem ferre cōmodè non cōtingit: Sic omnia uitia quæ capitalia fuerint, hac demū religionis uelut umbra necabuntur. Atq; hoc quod de Deo, & de religione in Deū dictum à nobis hoc loco est, sic primum est in puero & ante omnia curandum, ut nihilominus intelligatur in quoniam id uitā pertinere debere: omnis enim profectō uirtus, omnis dignitas, omnis uitæ iucundæ ac beatæ spes, in hoc uno studio præcipuè posita est, ut Deum & amare & uereri non desinamus. Sequitur altera puerilis animi cultio, posterior ea quidē illa quam modo diximus, sed ceteris longè antecedentior, ut pater qui filiū suum alere atq; educere ad laudem excellentis uiri cupiat, talem sese illi ostendat ipse, qualem eum effici uult: non enim ulla hac esse potest præstantior disciplina. Neque hoc eò dico, quòd non multa sint quotidie uitæ ornamenta adaugenda in pueris, quæ in parte fortasse nō sunt: ut literarum, uerbi causa, atq; artium illarum quæ optimæ nominantur studium atq; cognitio, aut iuris ciuilis, Pontificij uel scientia, belli quoq; & militiæ, si id ita contingat, exercitatio atq;

usus,

usus, fieri enim potest ut pater horum omnium expers parentū suorum culpa, uel etiam fortunæ existat ipse, quæ tamen in filio procuranda sunt; cōmune enim est & à natura inditum in omniū animis parentum desiderium, ut filios relinquāt meliores & clariores se, quod euenit amore quodam naturali, neq; magis filij, q̃ sui ipsius in unoquoq; propter insitum & innatum studium perpetuandæ uitæ, quo ad cupiditatem rapimur immortalitatis; pater enim in filio ipse uiuere, & trāsferre semetipsum in suam imaginem sibi uidetur. Sed ut aliqua in patre desint, ad quæ nō amplius iam illa est ætas, fundamentum tamen omnium in ipso est, bonus rectusq; mos uidelicet, & constans ac grauis domi disciplina, de qua summam nobis dicendum est, & hic locus totus continenti oratione breuiter comprehendendus: quandoquidem quæ ad literas & ingenuas disciplinas attinent ordine paulò ante proposito, in secundum locum dicendi reiecta sunt. PAV. Et rectè quidem, nō enim difficile postea fuerit reuertì ad annos & pueritiæ primordia, si sic fuerit opus: & ego nunc quidē hac parentum

tum

tum uirtutis, & quasi quadam in filijs delineatione ualde delector. Siue q̄ est egregia & digna animaduersione ista res, siue quòd horum maximam partem ego quoq̄ in memet à uobis, qui me aluistis, ac produxistis, expertus sum. I A. Sit igitur hæc prima parentibus proposita lex erga eos liberos, quos ipsi uolunt ad uirtutis optimam frugem producere, ut quales eos effici studeant, tales ipsi eis uideantur. Neq̄ hoc tamen quod præcipitur à nobis facile factum admodum est: quod ei qui uelit assequi, non scenda & tenēda est in rebus mediocritas: cuius usus difficilissimus, fructus præclarissimus semper fuit. Verum si quis forte fuerit pater qui minus ipse regendo filio idoneus, illum tamen cupiat in uirū magnum adulescere, requirat magistrum aptiorem, cuius in disciplinam filium suum committat: satius enim externis moribus probum, quàm domesticis degenerem filium educari. Et hoc tamen factitatum sæpe à summis uiris non legimus solum, sed peraspeximus ipsi: nisi forte Philippi regis Macedonum consilium reprehendendum est, qui cum Alexandrū filium haberet ea spe

atq̄

atq; indole maximæ uirtutis, quā res deinde ab illo gestę comprobauerunt. Tradidit eum à puero summo Philosophorum Aristoteli instituendum. Sed nos quidem sic nunc ponamus, tanq̃ parens ipse ad puerum instituendum atq; erudiendum aptus sit, quod & sæpe animi ardore quodā efficitur, ut etiam si antea minus cogitauerit quæ ad eiusmodi uitam moderatam atque grauem pertineant, amore filij incensus in eam curam totum se conferat. Adhibenda igitur, ut diximus, est mediocritas, sine qua nihil uel specie præclarum, uel usu iucundum uerè esse potest: cuius etsi integram, plenamq; notionem sola philosophia præbet, attamen qui natura bona præditi, atq; ingenio bono, laudem sibi adipisci ex uirtute cõtenderunt, etiam absq; philosophia aliquam aliquando in se imaginem huius omnium uirtutum dominæ mediocritatis haud ignobilem expressere. Hoc ex genere hominum sit pater: natura moderatus, uirtutis ac dignitatis studio præcipue flammans, qui se totum in animū ingeniumq; pueri per oculos & aures illius infundere studeat, Statim enim coniicit oculos puer

in patrem

in patrem familiæ, ut primum ualere cogitatione incipit; attentiusq; omnia illius dicta & facta intuetur, ut magnopere sit pendendum, ne quem fingere ipsi atque formare ad omne uirtutis decus cupimus, aliquo ex nobis eum dehonestamēto potius inficiamus. Quoniam uerò sensus oculorū sensum audiēdi anteit, priorq; adhibet uim sibi à natura traditam, ponenda primum ante oculos filij species in patre est grauis uirī, quæ in amictu, & omni motu corporis animiq; consistit, inq; his rebus omnibus quæ domi geruntur quotidie, in quibus pater seruare uestitus cōsuetudinem eam debet, qua populus maximè utitur, ita uti neq; nimis uestimentis lautus, quod leuitatis; neq; rursus plebeius sit, aut sordidus, quod aliquando negligentiae, sæpius autē ascribitur auaritiæ; motus uerò animi sui atque impetus, qui ab iracundia, ab aliqua molestia, ab amore, ab odio, à spe, ab inopinato gaudio, ab alicuius mali & calamitatis metu, à subitis tristium rerum nuncijs, à cæteris cuiusq; modi affectibus, intestinisq; pulsionibus feriunt animos & quatunt, & de statu eos demouere conantur,

ita sustentet & regat, ut appareat intuenti,
motus illos animi quamuis incitatos & ce-
leres, expectare tamen & morari rationis
imperium; nec excurrere audere, nisi cum,
& quoad illa praeſtituerit: quo ſpectaculo
quidem nihil cerni in rerum natura poteſt
diuinius. Quid enim oculis hominum tam
praeclarũ, tamq̃ magnificum, atq̃ in omni
pulchritudinis dignitate tam eminens acci-
dere poteſt, quàm uirtutem animi intueri
moderātis motus, & cupiditates ſuas, easq̃
ad rationis normam apte dirigentis: qua
conſuetudine ſi à primo imbutus puer in
parente ipſo fuerit, ne ille egregiam ſemen-
tem in animo conceperit futuræ in ſe prae-
ſtantiffimæ uirtutis. Sed hanc modēſtiam
& temperationem animi ſequitur corpo-
ris in omni motu ac geſtu quædam quaſi
tarditas: nō ponderis illa, neq̃ lentitudinis,
id enim plerūq̃ ignauitiæ, & deſidiæ potius
eſt, aut etiam ſtultitiæ interdum, & ſtolidi-
tatis. Sed quę ſe ad illam interiorem graui-
tatem accōmodet, eiſdemq̃ & aſtringatur
habenis, & laxetur, quibus regiſ animus,
ut cum eueniat interdū ut acrius aliquid
agendum contendendumq̃ ſit, manuum,
pedumq̃;

pedumq; celeritas, & uultus, uocisq; acrimonia, nō interdicta nobis à natura, sed ab ratione intus atque consilio ad usus necessarios reſeruata fuiſſe uideatur. Hoc, ut dixi, quod eſt ipſius uitę quaſi decorę quodam, ornans illam totā atq; illuſtrans, noſſe quid quacunq; in re deceat, & quando & quatenus, maxime quidē comprehenditur & p̄ficitur ex philoſophia: quæ una facit, ut ſit ipſum ſibi undiq; & in omnē uitam ſemper cōſentiens: ſed plurimū etiā etas, & rerū multarū uſus affert, & in humanis euentibus qd plerūq; acciderit, & accidat, diligēs animi aduerſio, quæ & philoſophię ipſi materiā inſtrumētumq; ſuppeditat, & ſola ſine philoſophia in homine acuto natura, atq; p̄bo, ſpeciem poteſt effingere uiri ſapientis: plenam autē ac perfectam ſapientia nequaq; poteſt. Debet autem paterfamilia cū ſemper animū ſuum habere in poteſtate, tum uerò cū præſente filio aliquid eiufmodi cōtingit, in quo uideat̄ debere cōmoueri, aduocare meminerit conſiliū rationis: neq; ſolū quod cōueniat, agere id atq; exequi: ſed cum quadam etiā dignitate, ut quàm maxime fieri poteſt, in

animo pueri illæ præclare species insinuentur, & infideant, quæ ubi sedem sibi, locūq; in eo constituerint, usumq; & auctoritatem domicilij fuerint nactæ, nullo postea modo passuræ sunt dedecorosas alias, deformisq; species prope se accedere, aut diutius confidere. Sit itaq; pater ab hoc uitæ instituto pius ac reuerens erga Deum immortalē, cum æqualibus comis, maiorū absq; assentatione & uenditatione sui obseruator; in seruos uerò ac domesticos mitis potius, q̃ asper; uerū ut retineat grauitatē imperij, sibiq; ad nutum omnis preſto esse instituat, utaturq; domi breuiloquio, uoce leni quidē, atq; placata, sed uerbis ualentibus; neq; seruorū congressus & colloquia nimis sæpe appetat, adeuntibus tamen, & aliquid expostulantibus, semper sit comis, respondeatq; summam quod sit æquum & bonum. Vt autem ipsi inter se sint concordēs & pacem colant, neminiq; fiat iniuria; atq; uti inopia laborantibus, uel etiā morbo oppressis ipse subueniat cum quadam cura, significationeq; beneuolentiæ, uerbis quoq; & factis aliquantò benignioribus; hoc patri utiq; familias non in

ultimis

ultimis habendum est, si eos continere in
 amore sui, & in magno metu suæ amitten-
 dæ familiaritatis uelit, quam illi sic tracta-
 ti, sæpenumero uita sua habent cariorem:
 & inest tamen in hoc toto genere grauitas
 quædam & autoritas imper. j, specimen di-
 gnitatis eximiū demonstrans, quæ ad ma-
 gnificentiam animorū exaggerandam per-
 tineat: ingenerandum est enim in animo na-
 turaq; pueri excelsum illud & rectū, quod
 nec in potentioribus obseruādis grauitate
 careat, neq; in regendis humilioribus man-
 suetudinē deponat, cuius uti pulcherrima,
 sic difficilima est tractatio: & tamen eius
 prima lineamenta ducere in animo filij, sui
 imitatione debet pater, q̄ postea in eo ætas
 illustret, usus confirmet, philosophia perpo-
 liat. Atq; hæc nos sermone percurrimus,
 non ut instituamus familiæ patrem, maius
 enim id negociū & maioris operæ sit: sed
 quantum ex eo manare ad filium boni mo-
 ris quadā specie uirtutis ac dignitatis imi-
 tanda potest, id ut quasi penicillo leui duca-
 mus, & describamus in animo recēte & te-
 nero, quo tanquā in arbuscularum molli
 adhuc cortice incisæ literæ: sic hæc uirtutis

in puero descriptio , tempore demū aucta
 & cōfirmata obcalleat. P A V. Optime istuc
 quidem, nam nec difficile fuerit, meo qui-
 dem animo , ubi tales parentes extiterint,
 filios probos & prudenteis existere. I A C.
 Rectè sanè : sed ego illud abs te existimari
 Pauie uoio, cū uirtutis omnis doctrina aut
 in exemplis cōstituta sit, aut in præceptis:
 hoc est, ut uel oculis, uel auribus in animo
 concipiatur , maiorem propè habere uim
 hæc quæ quasi prætereundo, & non dedita
 opera fieri uidētur, tantumq; exemplo mo-
 uent oculos ad informandas puerorum ad
 uirtutem mentes, quàm quæ ad hunc eum
 ipsam finē palàm intenta sunt: mouet enim
 illa admiratio paternæ uirtutis, quæ in
 quotidianis moribus elucet , pueriles ani-
 mos ad uoluntatē imitandī, præclaroq; spe-
 ctaculo inuitat, ut fieri cupiāt similes: cum
 præsertim uideāt eos qui circum sunt, cum
 silentio & ueneratione patrisfamiliaē impe-
 ria exequi: obuersatur enim illis ante oculos
 & in intimos sensus obrepit, nec uigilantibus
 solum, sed sæpe etiam in somno,
 decorū & pulchrum illud, quod est solum
 per se, suaq; sponte spectabile : cuius aspe-

ctus & admiratio prompta est, eaq̃ omniū
 communis. Scientia uerò paucis concessa,
 atque in hoc quidem genere tacita magis,
 quàm uocalis patris eloquētia ad instituen-
 dum filium proficit, ea uidelicet quæ ipsis
 factis loquitur : nam uerbis agere, & dare
 ea uitæ præcepta filio, quæ pater ipse sibi
 non sumpserit, idem est ac profiteri se itine-
 ris ducem esse in eum locū, à quo ipse lon-
 gè diuersus abscedat. Quòd si talē ut queat
 gerere personam, aut à natura non accepit
 pater, aut sibi ipse studio & meditatione
 fingere non potuit: eum, ut iam diximus,
 hominem requirat, cui recte in disciplinam
 filium possit tradere. Verum nos, ut cœpi-
 mus, in patre insistamus, qui aut esse talis
 debet, aut ut sit, optandum certe est, qui
 præeundo filium possit ipse in iter rectum
 ad uirtutem deducere. De quo nondum à
 nobis dictum est, quod est maximum, &
 ab hominum usu fortassis atque opinionib⁹
 bus longè remotissimum. PAV. Quod nā
 quæso istud est: magnum enim esse profe-
 cto, quicquid sit, necesse est, quod ad tot
 res, tam præclaras, quot iam strictim ora-
 tione percurse sunt, aliquam accessionem

queat afferre. I A. Hoc nimirum est, in quo uita communis tanquam in scopulo erroris alliditur, quòd omnes pene homines diuitias putant & magnitudinem pecuniæ ad uitam benè ac lautè agendam, maximum simul adiumentum, ornamentumque existere. Atque hoc fortasse non usquequaque falsum est, magna enim commoda atque adiumenta hominibus, non ad uitam solum, sed ad usum etiam exercitationemque uirtutis, à pecunia parata atque à domesticis opibus sunt. Sed hac opinione & sententiâ longius ductos, nescire sibi cõstituere finem, & modum ignorare tam quærendi quidem, quam etiam utendi; nullam hac ego statuo pestem in humano genere perniciosiorem incidere potuisse; per quam quod patet scilicet, & perspicuum est, hominum inter se societas & fides iampridem sublata penè, & de uita tota exterminata est. Ast ego contra contendendo, domum eam quæ diuitijs, pecuniæque redundet, necessario omnis recti moris, & propter eam causam uitæ quoque pacatæ ac iucundæ expertem esse. Neque ideo dico, quòd paupertatem & inopiam è contrario adsciscendam putem; facile enim assentior

Regi

Regi sapientissimo Deum obsecranti, ut nec diuitias sibi, nec paupertatem, sed tantum ad degendam uitam donet necessaria: quam item sententiam, pater ille philosophorū, noster Plato comprobat. Sed cum flagitia hominum & scelera maiora quædā sint, alia minora, suscipiendum est, maioribus nimiam rerum copiam fontem originemque esse, minoribus inopiā causam afferre. Ego uero malim eius familiæ, e qua ingenuum puerū, adolescentemque institui-
mus, sic opes domi, & fortunas esse constitutas, ut dominus quæstum nullum faciat, sitque domesticis uectigalibus cōtentus, quę potissimum consistant in fructibus prædiorum, ea porrò suppeditent ad usum cultumque quotidianum, non modò comimode, uerum etiam liberaliter: sed quibus dispensandis frugalitas adhibeatur: nam luxum, & opulentiam, & uarietatem supellectilis, multiplicesque domi ornatus, atque cultus, tanquā uitæ uenena imprimis fugienda esse duco: frangit enim, & conterit uim totam uirtutis, animūque prorsus dissipat illa abacorum, mancipiorum, gēmarum, tabularum pictarū, uestisque stragulæ elegancia,

ac uarietas, suiq; inani in admiratione detinet; ut uanissimis studijs homines occupati, ad ea quæ sunt uirorū industriæ nervos & cōtinentiæ nequeant intendere: ac tunc minime, si in quotidianis epulis, & ijs quæ epulas sequuntur, ludis, iocis, cantibus, festiuis lepidisq; dictis, omnis & uitæ & pecuniæ fructus reponatur. Hoc enim ex genere uitæ, & assiduus domi delitijs, uini, cibiq; affluentia, ac quotidianis quodā modo lustris, cum dies, & horæ, & tempora in aliqua semper uoluptate consumantur, non modò feroces, & infesti, & arrogantes animi adolescentium fiunt, sed immoderati etiam, & effrenati, & crudeles, atq; in omni genere deprauati: ut in naturam mentemq; tyrannicam euadant, nihilq; iudicent rectum, nisi ipsis quod libuerit: cæteros autē homines pecudum ac iumentorum instar sibi seruire statuunt oportere; ut confitendum planè sit, qua in domo, atq; adeo qua in ciuitate huiuscemodi uigeant mores, seminem in ea omnium malorum & calamitatum esse iactam: nec fieri posse, ut status illius reip. aut diu quietus, aut in uniuersum diuturnus sit. Atqui hanc uulgus liberalis

beralem uitam appellat : falsò istud quidē,
 uti alia multa: quippe cū ex hac potissimum
 cōsuetudine uiuendi, his profusis &
 luxuriosis sumptibus, auariciam existere
 necesse sit, illam uiolentā & rapacem dico,
 per quā nationes urbesq; euertuntur. Sed
 quoniam de his rebus subtilius differendi
 non est in præsentia locus, sic patrifamilias
 præscribamus (sit modò is qui liberos cu-
 piat in uiros fortes, industriosq; euadere)
 frugalitatem domi, & temperantiam, ac in
 omni cultu uictuq; parsimoniā illi retinen-
 dam esse: quę tamen absit à sorde, nec minu-
 ti angustiq; animi indicium præsferat: qđ
 fiet, si quotidiano & penē statò apparatu,
 mēsis mundis potius quàm locupletibus,
 non obsonium parcē prębitum, sed conqui-
 sitio & uarietas fuerit repudiata: uidetur
 enim in hac moderatione uitę ratio inesse
 splendida & liberalis, uitium in utranque
 partem deuitans, digna sapiente patrefami-
 lias, cuius quod ad liberos educandos per-
 tinet, in hac parte quidem peculiaris cura-
 tio est: nam matres ferē & fœminę omnes
 indulgentiores sunt, itaq; infarciēdo & sug-
 gerēdo quodcunq; expetitum fuerit, cor-
 rumpunt

rumpunt mores puerorum, neq̃ aduersus eorum uolūtatem uel ipsæ quicquā moluntur, aut dicunt, uel alios patiuntur loqui: quo uno maxime regnum in anima cupiditatum, & Tyrannis ipsa alitur. An non attendisti his diebus Paule, cum Persarum res gestas legeres (me enim autore & Cyrum Xenophontis, & Herodoti historias Græcè amplexus es) quantum ex diuerso cultu institutioneq̃ puerili, diuersæ Regū illorum naturæ, & contrarij inter se mores extiterint? Cyrus ex patre nobili ille quidem & imprimis claro apud Persas, sed tamen in illis moribus educ̃to, quibus panis & aqua cibus, obsonium autē nasturtium herba, aut si carnibus uellent uesci, illę erāt labore & sudore, nec sine uitæ interdū periculo in syluis & à feris expetendæ, magnus extitit Rex, natus ad res gerēdas, laudem & gloriam in imperio amplificando unam præcipuè spectans: cuius erga populares comitas atq̃ equalitas, in bello uictas nationes clementia, atq̃ iustitia effecit, ut non magis eum carum haberent ciues sui, qui semp̃ amauerant, quā deuicti hostes, qui antea illi grauiter offensi fuerāt: nomē

quidem

quidem illustre est, & sempiternam laudē
uirtutis ad posteritatem consecutus. Hic
Cambyfen filium, quē hæredem nominis,
atq; imperij relicturus erat, alijs ipse uide-
licet negotijs occupatus, alendum mulie-
ribus permisit; non enim uirtutis uim, neq;
rationē ē philosophia, quæ una facit, ut illa
sit sibi in omnem partem consentiens, sed à
natura tantum acceperat; ergo dignum in-
uenit in progenie sua muliebris disciplinæ
fructum: omnibus enim in delitijs, & mu-
lierum blandimentis educatus Cambyfes,
& assuefactus à puero, nihil offendere qd'
esset suis cupiditatibus obuiū, postea Rex
appellatus, ad eā intemperie animi amen-
tiamq; progressus est, nihil ut cum neq; sa-
turare, quod usitatū esset, neq; quod legiti-
mum delectare posset: ita ad cædes multo-
rum, & in his fratris sui germani, furore
quodā amentiaq; inductus, cum etiā Deo-
rum immortalium numini illuderet, ad ex-
tremū sibi manibus allatis, & semetipsum
unā & totam Cyri domū pessundedit. De-
latum est postea ad Darium Persarum re-
gnum, spectatę nobilitatis inter Persas, sed
cuius tamen domi cultus atq; fortuna lon-
ge à

ge à regalibus delitijs abfuiſſet. Is porro ad imperandum nō eandem fortasſe animi magnitudinem quā Cyrus, parem quidem iuſtitiam atq; humanitatem attulit: quare eius quoq; opera regnum Perſarū maius effectum eſt: è quo genitus Xerxes ab eadem atq; Cambyſes educatione muliebri, paternaq; negligētia, Perſas honore & laude cumulatōs, graui ipſe dedecore & calamitatibus plurimis affecit. Atq; hæc iccirco memorata ſunt à me, tibi Paule ut appareat quod pluribus uerbis fuit neceſſe dici, nullum eſſe obicem ad uirtutem adipiſcendam maiorem, q̃ delicias domi, & conquiſitiores, q̃ moderata ratio poſtulet, rerū apparatus: quorū ſtudio ſi captus fuerit parens, nil eſt quod contendat fortē & ſtrenuum, & idoneum magnis rebus poſt ſe filiū relinquere. Quid ergo eſt: placet mihi ſeueram & caſtam domi eſſe diſciplinam: neq; eam tetricam tamen, ſed cōdītā liberali quadam comitate, ut domeſtici nullius rei indigeāt, amici autem & hoſpites intro libenter commeent: ad quorum aduentus, inuitationeſq; paterfamilias ſplendorē cōuiuij, & hilaritatē uultus ac ſermonis maiorem

iorem aliquantò illa quotidiana adhibeat:
 lautius quoq; accipiat, & elegātius, nec ta-
 men pfusis sumptibus (hos enim semper
 abesse à bene constituta domo uolumus)
 Quin in ipsis epulis & uino tacita poterit
 inesse exploratio & obseruantia quædam,
 quo se nam pacto filius gerat: num patriæ
 disciplinæ ac moderati usus memor, pудо-
 rem in conuiuio modestiamq; retineat, no-
 ueritq; sibi ipse in poculis temperare: hoc
 enim documentum capi in pueris atq; ado-
 lescentibus imprimis conducere cēset Pla-
 to, ad speculandum quæ sit natura cuiusq;
 neq; id nos repudiamus, etenim consilium
 est periculo uacuum, præditum utilitate,
 in quo si satisfecerit adolescens, lætitiāq;
 conuiuij hilaritate potius & sermone libe-
 rali, quàm palato & gutture metiēdam sibi
 duxerit, næ de eo non nequicquàm sperare
 licitum fuerit, talem eum fore, qualē quisq;
 debet unus suum optare filium ut sit pa-
 ter. Sed ut nostræ in hoc genere præceptio-
 nis summam faciamus: debet is paterfami-
 lias, qui in ingenua disciplina ac liberali,
 eadēq; casta & moderata alere liberos suos
 uult, sic habere constitutam domi quoti-
 diane

dianæ impensæ rationem, ut & parsimoniã
sciat tenere sine sorde; & splendorem ac li-
beralitatem adhibeat, cum uenit usus, sine
profusione & luxuria: ab omni quidẽ par-
ua & cõcisa cogitatione rei cuiusq; uel mi-
nimæ curadæ prorsus refugiat, qua omnis
planè eijcitur ex animo ingenuitas, & uir-
tutis indoles obsolescit: hoc enim ex gene-
re morosi, & difficiles, & molesti homines
efficiuntur, nec cæteris solùm, sed sibi ipsi
infesti, omnia quasi semper desperantes,
ijdem lucifugi, pusilli, ubi in cœtus se de-
dêre, ridiculi, siti prope in angulis, nihil læ-
tum & liberum in animo comprehendē-
tes: oppleti mentem sordibus, & minutissi-
mis occupationibus, quo quid uirtuti, gra-
uitati, dignitati, altitudini animi fieri po-
test inimicius? Sed, ut ab hoc aliquando ge-
nere abeamus, habes Paule in patre formã
eius exempli, effigiemq; dignitatis, cuius
ego aspectum & contemplationem propo-
sitam uelim filio ei, qui ad magnas ipse ala-
tur, ad imitandum atq; assequendum: quæ
quidem in oculorũ sensu posita sit, quorum
interdum muta speculatio non minus pfi-
cit ad uirtutem, quàm aurium auditus uo-
calis

calis, de quo ipso posthac dicendum nobis est; hic enim sensus disciplinæ est, & doctrinæ & omnis sapientiæ peculiaris ac proprius, ut qui animum solus cernat, quæ nequeunt oculi intueri. Itaque Socrates ille Græciæ sapientissimus, oraculo quoque Delphico sic iudicatus, cum adolescentem quendam facie honesta ac liberali diutius contempleretur, illeque adstaret tacitus, dixisse fertur, Tandem ut te uideam aliquid loquere; uidelicet ille hominem esse ipsum animū, animi autem cognitionem & perspicientiam non oculis, sed auribus attribuebat; neque id iniuria, hauriunt enim aures uocem, quam format & distinguit oratio, quæ cum sit simulacrum cogitationis atque mentis, uehiculum sensuum intestinorum, ex animo ad alium animū uiam sibi faciens, perfert meditationes & cōmenta illius mentis, unde ipsa profecta est, per aurium meatus ad alteram mētem, legationeque opportunissima & maxime utili fungitur, ut quæ in arcanis mētium penetralibus occulta alioquin laterent & abdita, hæc auditus uocisque ministerio, cum tota humanorum animorum nobilissima atque acutissima gente cōmunis

centur. PAV. Et si quæ de uisione oculorū dicta à te sunt, quatenus per eos species quædam magnifica atq; grauis transmittitur animo, cuius ille exemplo & imitatione sit ornatior, summopere me delectauerunt; tamen expecto non minorem ex aurium sensu uoluptatem: quippe cum earū ope, illa ipsa quoque quæ de oculis dicta sunt, ad animū meum grata iucundaq; peruenierint. Nanq; & tu ad hunc ipsum sensum ornandum ac cōmendandum ijs uerbis usus es, ut non mediocris mihi sit in te audiendo facta expectatio. I A C. Agemus hoc loco Paule id quod tu paulò ante dixisti facto opus fore, si accideret usus, ut reuocemus orationem ad priores annos, quos noster sermo erat prætergressus, perueniatq; ad quandam metā, hoc est ad terminum eius ætatis, quā nos tribus septēnijs, & quartī dimidio admodum intendimus definire: illo enim institutionis genere, quod exemplis & moribus maiorū intuitū uitam uirtutis imitatione exornat, tota modo à nobis adolescētia comprehensa est. Cum uerò ad ea referri orationem oporteat, quæ in præceptis & monitis, assiduissq;

duisq; parentum uocibus erga filios posita sunt, quò illis non solũ proponatur, sed exponatur etiam ipsa uirtus, Principiũ fuerit nobis ad hoc quintus ætatis annus: nã & is dimidium ferè staturæ conficit, quod ad mensuram corporis pertinet, quantum alterum tantum uidelicet, auctiõis & incrementi uiginti cæteri anni addunt consequentes; & eo uertẽte anno, primum puer qui in potestate mulierũ totus antea fuit, ad curam patrís bona ex parte traducitur: Iam enim & proloqui expedit quæ ipse intus concepit omnia, & planè intelligere alios loquenteis potest. Ergo ab eodem initio & fundamento, quo prius omnem nostræ edificationis substructionẽ de integro coagmentantes, ab religione inquàm, & ab Dei immortalis amore atq; cultu, principia iterum nostræ ducamus orationis; non enim si solem quotidie oriri & reuerti iucunde cernimus, propter excellentiam claritatemq; maximi syderis, cuius splendore & lumine exhalarescunt omnia, minus debet ad animum uoluptatis accidere, cum de Deo sæpius eadem repetimus, atq; adeo multò plus, quando omnis pulchritudo,

& fulgor, & uarietas cœlestium astrorum,
ab eius ipsius summī Dei infinita pulchri-
tudine, tanquā exiguīs riuīs deducta est.
Primum igitur & ante omnia curare de-
bet pater, ut animū pueri illo timore Dei
imbuat, de quo antè dictum est, qui timor
solus ad inuictam fortitudinem animi ad-
uersus humanos omnes casus firmandam
& cōstituendam maximè facit: quod erit si
uim illius, & ubiq; præsentiā, immensamq;
maiestatem, non tam rationibus quidem,
quas nondū capere potest filij ætas, quā
exemplis, & narrationibus rerum earum,
quæ diuinitus miræ acciderūt, exposuerit
filio: in beneficijs quoq; eiusdem Dei com-
memorandis, quibus & priuatim ipse ab
illo, & omne genus humanum cōmuniter
affectum est, & assiduus fuerit & diligens:
in quo mysteria nostræ religionis cōtinen-
tur, quæ sunt tradenda & insinuanda peni-
tus, neq; hac informatione filij ad pietatem
& religionem, quicquā habēdum est an-
tiquius. Quod præclare fiet, si quæ sancte
& pie filio de rebus diuinis monstrauerit
pater, ea non uerbis ipse tantū, sed factis &
operibus usurpabit. Secūdum Deū autem

Diuosq;

Divosq; omnes, quos aut bonitas Dei statim ab initio, aut post præclara ipsorum in terris merita, & honestissimè acti dies in cælum sustulerunt, quorum utiquè debet præcipuus uigere honos, & immortalis apud mortales gloria, parentes suos cuiq; maxime docebit esse honorandos, & re uera cum ferè omnia parentibus debeantur, ortus enim noster & uita, lux quoq; ipsa hæc diurna, quã ore, oculis, naribus, totius deniq; corporis contactu uolutatuq; libenter & iucundè percipimus, ipsis accepta referenda est: tum autem labores ab eis causa nostra suscepti, plenè curarum & sollicitudinis, quos illi ut alant nos, & producant, sistantq; honestè in cœtu ciuiũ, atq; æqualium nostrorum, non modò non refugiũt, sed appetunt ultrò, & consecretantur: digni profecto sunt, ut illis omnia à liberis gratia debeatur, quæ pietate potissimùm, & cultu eximiæ cuiusdam uenerationis reddenda est: quam sequitur procuratio illorum uitæ ac salutis, & ut eorum necessitates, atq; incommoda, labore, ac diligentia nostra depellamus: suppeditemus egestati, infirmitatẽ sustineamus, omnes domi forisq; mole-

stias, quæ undecūq; inferantur, ab illis propulsemus. Etenim si bene Hesiodus, qui iubet pari mensura reddere beneficium, quod ab alieno acceperis, aut cumulatione etiā, si queas, quantum tandem erit parentibus impendendum, quorū beneficijs par nulla est gratia quæ possit reperiri: nec uerò etiā quamuis infirmi, decrepiti, depositi, unquā inutiles filijs parentes sunt. Sed ut Diuorum imagines, & simulacra colimus, ob memoriā beneuolentiamq; eorum, quorū uultibus assimulandis illa efficta sunt, & quod arbitramur ipsos illos Diuos propterea ad benigne nobis faciendū propensiores fore: sic nullū Dei immortalis simulacrum apud nos, quàm in patre & matre potest esse præstātius. Atq; his ita erudiendus est tener animus filij in honore cultuq; parentum, ut pater matrem filio, mater patrem, utrunq; autem domestici ac familiares colendum ac uenerandum puero pponant. Neq; in solis tamen parentibus hic à liberis honos insistere: Sed ad auos, reliquosq; maiores, si forte superstites adhuc sint, progredi etiā debet: cū in illis omniū quæ à parētibus accepimus causa uideatur

etiam

etiam esse antiquior. Porro ab hac in patres auosq; reuerētia, hocq; honore pio ac debito, reliquus quoq; iste honor & cōmunis cultus, qui senibus, & grauibus, & ætate affectis hominibus impēditur, tanquā ex alueo pleno pudoris & probitatis exuberat; iustus ille quidem, neq; illi ætati non congruens, quæ sibi patrium nō immerito nomen uindicat; nam & de principio pueri quos nondū subtiliter & exquisite ex oris uultusq; lineamētis possunt discernere, illo aspectu senili admoniti, cunctos uocant patres; & déinde postea cum æqualibus consuetudo propè fraterna coniunctioq; amoris præbet in patribus eius nominis cōmunionem. Iam illa ætate quicunq; est, si non generatione, at consilijs potest puero atq; adolescēti fieri pater. Quā ob rem rectissime Romulus, siue ille Numa extitit, quorum alter urbis, alter iuris & religionis Romanæ fuit parens, hac senectutis cū nomine paterno cognitione adductus, summum consilium Ciuitatis Senatum, ipsos autem Senatores Patres nominauit; statuitq; senioribus decedi de uia, caput nudari, & assurgi aduenientibus ab iunioribus

debere: quod maxime ac diligentissime La-
cedæmone obseruatum fuisse literis tradi-
tum est: mirum enim quanto in honore ha-
bita fuerit semper in illa ciuitate proue-
ctior ætas. Ex quo extat illud: ab homine
Spartano falsè ac doctè Atheniensibus ex-
probratum. Ludis enim Athenis cùm La-
cedæmoniorū legati in gradibus orchestre
honorificò sanè loco assedissent, postq̃ ali-
quantū pleno iam theatro ingressus senex,
innixus baculo, homo sanè haud magni
precij, circumiret quærens locum, neq̃ eū
sessum reciperet quisquàm: ut uenit ad La-
cedæmoniorum legatos, illi confestim ob
ætatis reuerētiam honorificè assurgentes,
superiore illi subsellio concessere: propter
quod eis cū esset maximo plausu ab uni-
uerso theatro gratulatio facta, unus eorū
non illepidè, Ergo probè, inquit, norunt
Athenienses quid facere rectum sit, sed id
facere ipsi negligunt. Formandus itaq̃ pa-
rentum præceptis & diligentia est puer, ut
honorē senibus, & maioribus natu habere
condiscat, habeatq̃ eos penè in parentum
loco: proficit enim huiusmodi obseruatio
cultusq̃ maiorum ad omnem uitæ mode-
stiam

stiam adolescentibus plurimum, quod & pudorem in animis eorū ingenerat, & multos illis actorū dictorumq; suorum constituit testes, ut nullam in partem ipsi audeāt extra honestum & rectum se commouere. Dum enim quos uerentur & colūt, eorum magisterium (ut ita loquar) & malam de se reformidant opinionem, difficilem habent magis rationem peccādi, deprehensiq; erubescunt; unde à uerendo dicta est uerecundia, quæ est actus ipse pudendi atq; erubescendi, in uultu peccatum pingens, & liberalem ferens criminis cōmissi multam; uadem boni ingenij tamen, & expectatæ in puero uirtutis, ut sanè apposite uideatur dictum, Erubuit, salua res est. Nam pudor ipse habitus est cauendi, & prouidendi, ne quid tale contingat ut sit erubescendum, omni quidem ætati congruens, sed ornamentum præcipuum adolescentiæ; quem si amotorem flagitiorū, & propugnaculum cōtinentiæ uirtutisq; dixerimus, haud sanè falso eū appellauerimus nomine. De quo suaferim equidem parentibus, quibus nostra non leuis futura est autoritas, ut hanc pudoris stirpem in ingenuis animis satam

à natura, omni ipsi ope fouere ac propagare in liberis non post mittant : fructus ex ea uberes suorum laborum percepturi. Quāuis enim non sit pudor idem planè qđ uirtus, firmamentū est tamen præcipuum uirtutis; male enim de se opinionis atq; infamiae est timor, in quo seuera est & diligēs uirtutis custodia. Itaq; qui pudorem diuinum timorem esse dixerūt, huius uim affectionis melius denotasse sunt uisi. Solus enim pertimescit ne id amittatur à nobis, quod unum obtinemus honore ac dignitate propemodum diuinum, decus atq; honestatem uidelicet. Ac cæteros mortis & periculorum pauores, metus, formidines, qui animos abijciunt ac prope exterminant, cum plerūq; uanos atq; inutiles, tum semper turpes esse merito existimamus, quorū etiā species ipsa indecora & illiberalis sit, nam & lurido pallore os, & tremoribus membra concutiunt atq; deformant: quod accidit animo refugiente ad arcē uitæ quæ in corde est, & omnia illuc subsidia undiq; aduocante : ut quasi deseruisse exteriorem mœnium ambitum, & celsisse hosti loco uideatur : pudor uerò occurrit foras, extra

enim

enim est periculũ, ab opinione scilicet, atq; oculis, & ruborem in uultu, tanquã personam ad peccatum opponens, se cælatum cupit, in quo ipse sese indicat, nec tamẽ magis deliquisse sese, quã uri in animo, q̃ deliquerit, ostendit: idẽq; ita uenuste facit, ut cũ uideatur fateri peccatum suum, in eo ipso deceat in quo fatetur. Sed quoniã de his satis multa, redeamus ad id quod dicebamus, illud idemq; de integro sæpiusq; dicamus, huius affectionis uim atq; naturã quã timorẽ alit in animis ignominia, atq; propagat, ab eis patribus, quibus recta liberorum educatio est cordi, studiose in filiis inferendam, colendam, adaugendamq; esse, ut quã quoad uera ratio & philosophia ipsa aduentet, bonam in eis mentem, opinionemq; custodiat: in quo aliqua non leuis à parẽtibus diligẽtia & cura est adhibenda. P A V. Quã mi pater: incredibile est enim quantopere audire cupiam. Nam & si acceperã à uobis, qui me aluistis, atq; instituistis, honorandos esse parẽtes, & maiores natu colẽdos, idẽq; ego pro mea parte ut agerem, essemq; uobis dicto audiens, studiose enitebar; nũc tamen cognita utilitate

uestri

uestri consilij, & quantus inde pudoris existat fructus intelligens, quod antea non animaduertebam, ero posthac in parendo, & perseverando etiam constantior: quod quidem mihi præcipue præter cæteros conuenit: quando cæteri à singulis, ego ex binis parentibus ad uenerandos, colendosque maiores productus sum. I A. Lætor Paule non inaneis fuisse operas nostras, quibus te ad philosophiæ studia applicare cepimus, iam enim mente concipere te intelligo, quantum ad rectum morem uera ratio & scientia ipsa firmamenti afferat. Sed quod de pudore in liberis alendo & conseruando dicebam, id eiusmodi est, ut patres quos iste amor filiorum ad decus & ad dignitatem instituendorum, dignus patria charitate indulgentiaque cepit, suscipiant negocium cum lenitate & mansuetudine, nec ullam asperam, ac perterricrepam (ut uetus Poëta inquit) erudiendi atque instituendi ineant uiam: uerum facilitate, clementiaque nitantur: uerum ut in omnibus seruetur semper grauitas: non enim usque eò demittere se debet pater, ut familiarem se, & ueluti sodalem constituat filio: ex quo oritur in puero patris con-

temptio

temptio, & fiducia quædā sui ipsius, ut tanquam nulla astrictus lege, quodcūq; libuerit, præfractius id concupiscat: neq; rursus ita austerus esse & pertinax, ut non multū comitatis atq; humanitatis filio impertiat: uiuamq; imaginem sui, qua nihil est parentibus in omni uita dulcius, nō ardore quodam beneuolentiæ foueat charius atq; amplectatur. Sed ut moderandū est amorī, ne nimia indulgentia corruptus puer, exuat metum & reuerentiam sui patris: sic à præcipiti & prærupta asperitate uehementius etiam abstinendum est, quæ amorem elidit ex animo filij, eumq; in id uolūtatis & studiij adducit, ut quæcūq; patri placere in se cognouerit, habeat ipse odio: & uel ad illius beralem animi timiditatem se abiiciat, uel si fuerit natura cōtumacior, nitatur in aduersum, & detrectando imperium patris, quotidieq; deterius aliquid faciendo, quasi paternas iniurias sibi uideatur ulcisci. Hęc intuens qua fuit sapientia & quo usu rerū maior ille Cato, imprimis ferre, & habere in ore solebat, Non minus pollui, & detestandos esse patres familiars, qui cōiugibus & liberis, quàm eos qui delubris Deorum

immor

immortalium manus attulissent. Et uerè si cogitare uolumus, cum nemini expediat metu contineri in officio, minime cōuenit liberis, quorum præsertim animos ad decus & ad honestatem cupimus informare: infirmus enim & debilis uirtutis custos metus est: quē qui adhibere in filiis uolūt, audiant Terentium è cōmuni uita huiusce modi patres cōmode admodum obiurgantem: Et errat longè mea quidem sententia, qui imperium in liberos grauius & stabilius esse putat, uel quod sit, quā quod amore adiungitur. Sit igitur hoc patri imprimis ppositum, ut se amari & magnificari uelit à filio: quod assequetur, si neque morosus, neq; asper, neq; singula curiosius insectās, nullamq; in partem immitis fuerit, & truculentus, præbueritq; se facilem & indulgentem filio, grauitate tamen ubiq; retenta: id autem erit, si ita facta dictis temperauerit, inter seq; miscuerit, ut in his quæ erūt studiū alicuius & uoluptatis (quæ quidem sit concessa atq; ingenua) nihil aut parum uerborū interponens, largiter cuncta suppeditauerit filio, siue equis ille oblectetur, seu canes ad uenādum appetat, uestitu

etiam

etiam indulserit liberali & splendido, neq̃
 nimio tamen: ac deinceps hisce omnibus
 ut uocare æquales suos, hospitesq̃ accipe-
 re domi, munerare etiam interdum aliquē
 ex sodalibus suis possit: hæc enim pater si
 nihil prius garriens cum filio, neq̃ ineptis
 colloctionibus iocum & hilaritatē quæ-
 rens, grauiter atq̃ magnifice, ac tanquā
 consilio certo, utenda, agenda, regendaq̃
 concesserit: mirum quātus in animo illius
 insidebit, & ad amorem, & ad reuerētiā,
 nihil ut audeat, ne cogitare quidem filius,
 in quo displiceat patri. Rursus si in his
 quæ erunt uirtutis atq̃ officiij, quæ ad mo-
 destiam, quæ ad continentiam, quæ ad co-
 mitatem cum æqualibus pertinebunt, hu-
 manitatē cum inferioribus, erga superio-
 res cultum, atque honorem, pater orationi
 præceptisq̃ non pepercerit, fueritq̃ in mo-
 nendo & docendo assiduus: Porro autem
 in rebus ipsis atq̃ factis, in quibus recta di-
 sciplina cernitur, nihil gratiæ causa permi-
 serit filio, neq̃ siuerit ut suo ille arbitrio, ac
 non ex præscripto patris, præceptisq̃ uir-
 tutis quicquā gerat, agatq̃: nimirū hoc
 modo maxime, illa pudoris fertilis uirtu-
 tum

tum & frugifera radix, idoneos nacta cultus, ad summam dignitatem in puerorum animis adolescet; neque illis solum metum ignominia, sed amorē etiam inijciat & cupiditatem incredibilem adipiscendæ laudis: altitudine quoque animi & cellis rectisque uoluntatibus illos adornabit, ut abhorreant omnem sordem indignitatemque; optimus enim artifex pater atque is qui refert ad dignitatem omnia, cum se & propter indulgentiam suam amari à filio, & propter grauitatem metui obtinuerit, facile illius ducet animum in quacunque uolet partem, nec ullum semen in eo uirtutis frustra iaciet. Itaque se ille primum cupiet à patre & laudari & probari, laudato ipso (ut Hector ille Neuianus inquit) uiro; deinde ad æqualium familiaritates, & consortia ita se dabit, ut cum splendore uitæ, & morum nobilitate illis antecellat, humanitate tamen uelit esse par. Sic uita erit, noster inquit Terentius, facile omnes perferre ac pati cum quibus erit, cumque una his sese dedere, eorum obsequi studiis, aduersus nemini; nunquam præponens se illis, ita ut facillime sine inuidia laudem inuenias, & amicos pares. At noster iste

ster iste aliquantum plus : præter laudem enim atq; amicitiam nouam, etiam admirationē summæ uirtutis obtinebit. Sed quoniam multa cadunt in hanc ætatē, quę sunt interdum uitio propiora, q̃ uirtuti : quod quidem necessarium uidetur ita esse, propter efferuescētiam cupiditatum, tum maxime, & quod nondum adulta in pueris & adolescentibus est ratio, quæ postea quam bene confirmata est, uix etiā uidetur posse senes, & etate prouectos homines, ab omni errato & culpa cohercere; diligenter uidentum est patri, ut ad regēdam & gubernandam lubricam ætatē filij multum æquitatis & patientiæ afferat, acuteq; dispiciat, si quid sit cōmissum uirtuti alienum, atq; officio : num id ex eo genere crimen sit, quod ad bonum mōrem corrumpendum ualeat, an quod ab ætatis & adolescētiae quasi fermento quodam fuerit profectum. Horum nos criminum genera in præsentia non distinguimus, alienus enim de his differendi est locus. Sed tamen sunt nonnulla in quibus pater dissimulare & pati, & aliquid. permittere adolescentiæ poterit, dum teneant illa aliquem modum, neque habebit

E

necesse

necesse omnia pro suo iure exequi. In quibusdam autem acrior, & uigilantior sit necesse est, nec patefieri aditum sinat ad ea insinuanda uitia, quę cum ætate postea accrescunt simul, indolemque statim ab initio, si inualuerint, uirtutis, mox & rem, & omnē bonam famam eijciunt: cuiusmodi alex, ganeæ, atque impotentes illi amores sunt, quos tyrannos animi præclare describit Plato. Ac in superiore quidem illo genere, quod mitius est, minusque periculosum, si euenierit ut non possit, aut ne debeat pater dissimulare, adhibeat filium, leniterque eū obiurgat, suam de illo curā, sollicitudinēque, & suum illi ipsi errorem detegens, oret, obtestetur, ut ne patris & propinquorum spem, suamque ipse laudem speratā, atque exoptatę dignitatis contendat ire perditū. Nec multa erunt opus, si rite ego coniecto, & superiora prudentis disciplinę præcepta cōstabunt: grauior erit patre improbator sui facti ipsemet filius, minusque sibi ignoscet, magnoque cū dolore feret preces & monita charissimi parentis. Sin autem (sed nollem tristius aliquid ominari, cū in hac familia, & in his moribus nihil uideat accidere posse

secus

secus,quàm uelimus) Sed tamē si quid de-
 terius fuerit factum, uehementer quidem
 agendū erit à patre,& uerbis grauioribus:
 non tamen usq; eò,ut ad trucem illam ira-
 cundiam se rumpat, quæ cum uocem uul-
 tumq; pturbet, gestusq; omnes impediāt
 loquentis, nunquàm non de grauitate de-
 trahit, & spectato uiro semp indecora est.
 Sed imitabitur senem illum Terentiānum,
 sat seuerè,ut uidetur,obiurgantem filium.
 Hem tibi,ne hæc diutius licere speras face-
 re me uiuo patre? Amicam ut habeas pro-
 pè iam uxorís loco? Erras, si id credis, &
 me ignoras Clinia. Ego te meum esse dici
 tantisper uolo,Dum quod te dignū est fa-
 cies.Sed si id non facis:Ego,quod me in te
 sit facere dignum,inuenero. Videntur ista
 permutura quāuis corruptum filium: hoc
 magis si fuerint ab ea disciplina,& ex eius-
 modi patris, qualē supra formauimus, ore
 prolata: cuius nullo exemplo in paternæ
 culpæ similitudinē filius deductus sit. Erit
 item remedio, si grauitas rei postulabit,ad
 quod tamen extremum decurri placet, Si
 pater à filio uidebitur factus alienatior,nec
 eum amplius ut cōsueuerat,adhibebit,pau-

latimq; pristinam suam in illum indulgentiam, & antea solitam restringet liberalitatem: uel enim proderunt ista, uel aliud erit agendum. Verum quod nos prohibemus in filio, ne cum pater uerberibus cedat, nec ingenuam naturam ad seruilem detrahat conditionem, id in seruo & operario homine facile permittimus: cuius ea sit natura, quem admodum de Phryge uetus prouerbum est, ut plagis fiat melior: quod etiam erit studiosius faciendum, si quod peccatum in filio aegre ferat pater, id contingat in seruo delicto simili ut sit puniendum: ut omnibus modis intelligat filius, mentem ab sese patris, quamdiu ipse illiusmodi fuerit, & a similibus factis uehementer abhorrere. Verum haec nos uaticinamur, & nequicquam tanquam accidere possint pertimescimus: a quibus omnis natura abhorret, non enim nec suspicandum quidem est, quos talis aluerit, institueritq; disciplina, & ad rectum iter uirtutis induxerit, ut eorum possit natura & uoluntas ad praua studia conuerti. Reliquum illud tantum uidebit pater, & in eo quidem intendet animum curiosius, ut perspiciat, et animaduertat cuiusmodi sint qui

de fami

de familia aut ex iuuetute, multa familia-
 ritate atq; usu adhærebunt filio: uigilandū
 est semp, multæ sunt insidiæ bonis nostris,
 inquit Ennius: & profecto uix datur spa-
 tium diligenti patri ullius capiendæ quie-
 tis. Sed ut illis sollicitudinibus & curis, si
 bene locatæ sint, nihil fieri possit dulcius.
 Ac de familia quidē breue præceptum est
 (quanquàm sui cuiq; domestici debent esse
 noti) ut omnes æqualiter colāt, honorentq;
 filium, & aliquid mandanti dicto audiētes
 sint: quotidianum autē obsequium, & cul-
 tum circa eum hi gerant, qui sunt nomina-
 tim præfecti à patre. Si quis uerò extra or-
 dinem insinuare sese in comitatum & con-
 suetudinem nimis studeat, is tanquàm ali-
 quid malitiose cogitās repellatur. In iuuen-
 tute maius periculū est, nam & maior sepe
 in magna copia sodaliū dissimilitudo inest
 morum, & sunt inter eos aliqui natu gran-
 diores, uel etiam annis longius proiecti,
 qui ex illa ætate simplici atq; lubrica ua-
 rijs suis cupiditatibus pastum quærunt,
 quorum imprimis pernitiōsa ingenuis mō-
 ribus est consuetudo: qui quidem omni &
 sono & strepitu, tanquàm insidiosæ aues, ab

grege māsuetarum perterrendi sunt. Iuuenem autem à iuuenum cqualium congressu, & consuetudine arcere æquum non est. Igitur ad omnia huiusmodi pericula remedium iam antiquitus usitatum, pedagorum cura atq; industria: qui cum assidui comites sint adolescentibus, cōtinent in officio, & aliquid prauè ceptantibus obuiam eunt: quos maxime probatos, & sibi fideles eligere debet pater. Sed etsi horum studium ac diligentia nonnihil aliquando proficit, nullum tamen fortius est in adolescentibus uirtutis præsidium, quàm pudor, de quo ante diximus, & illa ordine directa ac sibi bene constans disciplina familiaris, patrisq; imprimis sapiētia & grauitas, quam cum usu quotidiano imbiberit filius, exemplisq; illo domestico & præceptis patrijs imbutus, præclaras decori honestiq; imagines, quæ in animo illius penitus insederint, detulerit secum in forum, & se cum cæterorum moribus studiisque composuerit, tum incipiet notare atq; discernere, quid inter se atq; eos intersit, qui nequaquam simili à disciplina profecti sunt: nec tantum habuerunt Deorum immortalium beneficium.

Tunc

Tunc suis fortunis gratulabitur, gaudebitque experiri, & quotidie aliquid agere ex illo ingenuo more atque modo, cuius fructum percipiet non solum in animo suo lætitiā, sed ab æqualibus honorē, & à senibus admirationem, ab uniuerfis insignem quandam beneuolentiā; eoque uelut stimulo amoris & laudis ad ulteriora semper incitatus, fiet quotidie in omni bona parte usu confirmatior, benignitatemque imprimis exercebit, iuuabit quos poterit, omnibus erit comis, molestus nemini; probos & bonos arctiore sibi uinculo familiaritatis adiunget, reliquos non aspernabitur; ita aget dicetque omnia, ut in uerbis & in factis existat dignitas, non seuera illa & grauis, quæ maioribus natu cōsentanea est, sed quæ cum hilaritate modestiaque coniuncta maxime deceat adolescentiā. Denique omnem illam paternæ uirtutis ac dignitatis, optimorumque morum similitudinem nondum planè robustam, sed ueluti cū ætate secum unā pubescentem, in cœtum æqualium & comitum suorum domo transferet, ut multi qui intuebuntur ex eodem loco, eademque ætate, quosque illa egregia & peruenusta species

uirtutis cōmouerit,uideantur fore eo animo,ut conentur imitari;ex quo potest coniectura capi,quantū ciuitati & toti reipub. euenturum sit boni,si hæc rectè instituentur. adolescentiæ disciplina aliquando publicè coletur, cū unius interdum exemplo intelligamus cunctam penè iuuentutē ad imitationem uirtutis facilè accendi posse. P A V. Ita afficior inī pater, cū te hæc audio loquentem, ut lætitiā meā ipse uix feram;quippe qui Dei immortalis maximo dono adeptus sum,ut & hac uoluntate ad cōsectandam uirtutem,& in hac disciplina altius essem,ex qua fructus iam aliquos capere incipio ex his qui à te modò numerati sunt;sed cum in hunc uitæ statū & uirtutis usum perductus est adolescens, quid nam quæso illi amplius deest,quominus felix sit ac beatus? I A C. Totū id Paulē quod est maxime necessariū, uirtus ipsa uidelicet,cuius umbrā rectū esse morē iam totiens diximus;nobis uerò uestigandum & tenendum corpus est, ne tanquā in somno uisis inanibus decepti, sed uigilantes,& re uera summi boni efficiamur cōpotes, P A V. Iam intelligo te uelle philosophiam

phiam dicere. IAC. Volo inquam uerò: illa enim est una, sine qua nullius hominis uita (diuinam semper excipio sortem) suo pte certe ipsa cōsilio, nec sapiens unquam, nec beata esse potest. PAU. Cur igitur non quàm primum ad illam tertiam partem nostræ institutionis tendimus? in qua, ut arbitror, philpsophia ipsa inest: cuius tota est, ut dicis, uirtutis expositio. Et si enim me summopere hæc delectant quæ dicta sunt & dicuntur, tamen ad ipsum fontem & caput omnium uirtutū cupio accedere. IA. Vnum etiam restat Paule, de quo à nobis aliquid dicendum est, quod cū honore atq; utilitate primarium sit, propter quandam tamen opportunitatem in oratione à nobis factum est postremū: nullum enim adhuc uerbum de ueritate fecimus. At ea est præcipua non solum benè morata, sed etiā uere beatæ & sapientis uitæ procreatrix, sine qua nihil neq; probum, neq; prudens, neq; liberale, neq; magnificum uere potest existere. Quis enim mentiri & fallere non dico assuefactus (monstrum enim illud hominis potius quàm homo est) sed uel paululum modò inducēs animum, licere aliud

sentire aliquādo, aliud loqui, & habere linguam à corde discrepantem, in numero eorum ponendus est, in quibus species à nobis futuræ eximię dignitatis cōstituatur? PAV. Videtur uerò repudiandus quisquis ille est; nec mihi uenerat in mentem, cum tamen iam quotidie magis ex te, & in Aristotele ipso, quē te hortāte ac premonstrante in manibus habeo, possim incipere nosse hoc tantum & tam eximium bonum ueritatis. Sed cur de ea mentionem in hoc extremo, ut tute inquis, loco faciendā tibi reseruaueris, id ego audire ex te expeto. I A. Quia anceps est in utranq; partem, & cum in omne genus doctrinæ scientiæq; diffusa, tum ad bonum morem etiam pertinens: quoniam autem de more & disciplina domestica, qua imprimis assuefaciendus ad omnia recta & honesta est adolescens, dictū à nobis fuit: non quīn plura alia possint dici, sed quia hæc futura sunt satis. Nunc autem ad ea tendimus quæ nō tam consuetudinis, quàm certi consilij, & suaptæ scientia ac ratione directę uoluntatis sunt: ueritatem in utroq; genere instituendi præcipuam & primas ferentē parteis, in hoc potissimum

tiffimum loco constituimus, ut cum una
 eademq; dominetur utrobique, una quoq; &
 morale illud ac modestum facileq; monēti
 recte, obtemperans cogat agmen, & hoc sa-
 piens eruditumq; ducat. PAV. Quasi uerit-
 tatem uinculum dicas, quo ambo genera
 ista contineantur, IAC. Imò lumen à quo
 ambo & creantur & illustrantur, hoc qui-
 dem diurno sidere tantò potentius, quòd
 sol iste oculis, ueritas mentibus lucem &
 diē affert, atq; hic facit ut res, quales sunt,
 tales etiam cernantur; illa, ut quod sunt, id
 illud ipsum sint. Sed hoc lumen & propriè
 & proxime philosophia ipsa sectatur; om-
 nemq; suam curam, omnem operam stu-
 diumq; impendit in eo, ut huius luminis
 percipiēda ueritate fiat compos, quod cum
 apprehenderit, suumq; & proprium tenue-
 rit, iam ipsa in luce & in ueritate habitans,
 attollit in altum circum circa errantibus, ut
 cōmunicatione lucis illi admoniti, minus
 ruant in tenebris, minus perturbentur: in
 quò maximus est concursus omnium mor-
 talium, maxima uarietas; hi enim quanquā
 luminis aliqua ex parte participes, umbris
 tamē plurimis impediti atq; impliciti, quæ
 quò

quò longius absunt ab editiore lumine,
hoc uolitant maiores, sæpissime falluntur
in eo quod appetūt, & pro bonis mala am-
plectuntur; cumq; se pedē tutò ponere exi-
stimauerint, labuntur præcipites: hoc lu-
men, quod est sua cuiq; ratio, certissimis
scientijs ac doctrinis illuminata, & sibi ipsa
in omni cōsilio actioneq; pregressiua, neq;
alieno indigens ductu, philosophia ipsa cō-
tinet: ad quam quod sit rectum iter tertia
mox nostræ institutionis pars indicabit.
Sed ut in hoc lumine summe & maxime
ueritas est, sic in illo genere posteriore uir-
tutis, quòd disciplina & monitis diximus
comparari, quemadmodum luminis, ita &
ueritatis radius quidam inest: non princi-
pem, sed accersitam insinuās lucē. De quo
nobis restabat aliquid dicēdum, antequàm
de moribus & disciplina sermonem totum
compleremus: Ideoq; seruauimus in hunc
locum, ut à radio ad lumen, & ad ueritatē
ipsam à ueritatis simulacro propinquus
transitus foret. P A V. Cōmode sanè & ita
fuit faciendum. Sed quis est qui ista consi-
derans, non ad amorem & studium philo-
sophiæ totus rapiatur? I A C, Deberet hoc
quidem

quidem ita esse; Sed tamen nō desunt Pau-
 le qui illam contemnant, atq; ádeo uítupes-
 rent, & in inuidiam ad populum adducāt.
 P A V. Iniquos homines narras : estq; pro-
 pterea iandudū à te suscepta philosophiæ
 defensio aduersus uítuperatores huiusmo-
 di, quam ut perficias, atq; aliquando edas,
 cum alij sæpe multi, tum uerò duo doctis-
 simi & tibi amicissimī homines Paulus Io-
 uius, & Lazarus Bonamicus te quotidie
 flagitant : quorum de uirtute & doctrina
 quid sentias crebrò ex te audire soleo. I A.
 Quid nī audias de hominibus cum aman-
 tissimis nostri, tum dignissimis ipsis qui
 ab omnibus amentur, quorū magnum in
 utroq; nostræ ætati positū est decus? Nam
 Iouius non solum medicinæ scientia, in qua
 excellit, tam cognitione artis, quàm utilita-
 te ex ea & obsequio erga amicos, uerūm
 omnibus ingenuis & liberalibus discipli-
 nis instructus, imprimisq; eloquentia, & di-
 cendi genere quodam magnifico contulit
 se ad scribendam historiā, in qua ueterum
 optimorum scriptorum & fidem & gloriā
 in nostram ætatem refert. Lazari uerò in
 Latinis & Græcis literis, præsertimq; in
 hac de

hac de qua loquitur philosophia, tanta est eruditio, eaq̃ præstantis ingenij uis, ut ipsum cum audimus, nullius ex antiquis aut nouis doctoribus, aut scientiam maiorem, aut copiam requiramus: quod quidē in eo speciosius existit, quod ita uiuit, & ita factus ipse est, ut in omni uirtutis & humanitatis officio, philosophiā habuisse uideatur, non dicendi magistrum, sed facienti. Quibus quidem ambobus hoc quod dicis à me desiderantibus, quippiam negare esse arbitror nefas. Sed quū scit an diuino quodam cōsilio hic illi noster dialogus forte præpositus fuerit? P A V. Quid ita? I A. Ut per gradus, & uelut planiore uia, ab his præceptis, & rectè consuecendi disciplina, ad illa altiora philosophiæ cōsilia, & ipsum apicem uirtutis ascendatur. P A V. Verisimile hoc quidem, nam & bene cogitantibus semper adest Deus. I A. Redeamus Paule ad partē illam ueritatis, quam moralis huius disciplinæ esse diximus, aut potius quod melius hæc ueritatis diuisio intelligatur, sic agamus. P A V. Quo pacto? I A. Falsum, natura quædā est maxime contraria & inimica ueritati. P A V. Ita est. I A.

Huius

Huius partes sunt duæ. P A V. Quæ? I A.
 Vna pars cernitur in eo cum ipsi nosmet-
 ipsos decipimus, & praua aliqua opinione
 inducti, aut captiosis rationibus argumen-
 tisq; constricti, quæ cum aliquam cupidita-
 tem ualentem in nobis suffragatricem nas-
 cta sunt, maximam habent uim ad mouen-
 dum & persuadendū, scire nos arbitramur
 quod nequaquam scimus, hæremusq; in
 eo, & restamus confidenter: quod accidit,
 cum uel id quod est, nō esse, uel quod non
 est, esse, aut cuius est generis, rationis, qua-
 litatis, efficientiæ, id non illius, sed alterius
 modi esse suscipimus. P A V. Intelligo. I A.
 Hoc falsum Paule quod est erroris, menda-
 cii, & totius ignorantiae caput, Dñs medi-
 usfidius & hominibus est inimicissimum,
 quanquam in diuinam naturam non cadit
 falsitas, neq; error: ueruntamen tanquam è
 regione illi sempiternæ ueritati oppositū,
 non solum hominū mentes quotidie, sed &
 illas cœlestes, & incorporeas potuit olim
 peruertere: nec uerò grauiore ullo malo,
 acerbiorē atq; exitiosiorē alia ulla peste ui-
 ta nostra conflictatur & perturbata est,
 quàm huius labe ignorantiae, quæ sibi ipsa
 scientia

scientia esse uideatur ; hinc superbía , hinc
 cōtumacia, hinc illa immoderata atq; infini
 ta cupiditas , hinc nimius sui ipsius amor,
 & iuris atq; iniuriæ parū æqua descriptio:
 ex qua deinde illa in uitam tot incōmoda
 dimanant, iræ, inimicitia, bella, cædes, ur-
 bium & nationū funditus euerfiones, uni-
 cuiq; secum, nō solum aduersus alios, sem-
 per ferè dissensio, & cū popularibus, cum
 ciuibus, cum affinibus, cum cognatis gra-
 uis sæpe discordia; deniq; omnis hominum
 ad homines societas , quæ naturæ foedere
 ipso & conciliata & sancta est, huius tanti
 pernicie mali iandudum uiolata, conuulsa,
 & in totum pene dissipata est. P A V. Ma-
 gnum incōmodum prædicas ignorantia,
 mi pater. I A. Quid mirum, cum illa lumē
 animi nostri mentem ipsam extinguat, &
 falsis persuasionibus tanquàm clauis excæ-
 cet, si erroris & temeritatis & uariarū of-
 fensionum plena sunt omnia. Sed hoc tan-
 tum malum sola philosophia se ablaturam
 esse pollicetur; idq; adeo præstat, si ritè tra-
 ctetur , sitq; ad Deum & summum rerum
 omnium bonum tota cū fide & religione
 conuersa, Quod nobis uerū Deum & filiū
 Dei

Dei colentibus, unis assequi diuinitus est concessum. PAV. Sanè præclarum est hoc & philosophiæ, & Christianæ religionis donum. IA. Res ipsa indicio fuit ita esse, sicut dicis Paule; Sed quoniã non est huius temporis insistere in his diutius, ad alterã partem falsi, quo de agimus, accedamus. PAV. Equidem te in his morari diu uellem; nec est quicquàm quod audiam iucundius, rursusq; philosophiæ amore incendor. Sed uereor ne mea ignorãtia mihi quoq; ad illam adipiscendã impedimento sit. IA. Nequaquàm Paule, nec tu istam ignorantiam pertimueris, quæ ad discendum, & accipiendum parata est, tanquàm uacua domus & patens, utq; honesta supellectile instruat expectans. Illam tu mihi ignorantiam præsta ut caueas, quæ falsis opinionibus referta, in eisq; pertinax, cū orichalcum pro auro ipso amplexa fuerit, ueras amplius opes nil moratur; aderit tēpus, uel potius adest, cum explebis cupiditatem istam tuam, & nobilissimorum amorū fies compos; quorum iam gustum aliquem ex Ethicis Aristotelis, ad q̃ paulò ante es ingressus, percipere potes. PAV. Sic faxit ille summus

nostri generis conditor, idemq; post eiusdē
per unigenum filium suum cōtaminati &
perditi liberator effectus, cui me tota men
te atque omni corde deuoueo. I A. Atqui
hoc sentire & sic facere Paule, & prima &
summa est philosophiæ ueritas. Nunc at
tende de altero illo falso quid rei sit. P A V.
Dic modo. I A. Hoc falsum tanquā uir
gultum & propago ab illius prioris falsi
radice pueniens, consistit in eo, si quis non
se ipse fallens nec mentiens sibi ipsi, sed cal
lidus & gnarus apprimē, quid agatur, alte
rum uelit circūuenire & fallere, ut in erro
rem inducat, ut aliud illi pro alio obijciēs,
longē eum abducatur & dimoueat à uero; ic
circo autem proficiscitur à primo hoc alte
rum falsum, quod nequaquam circumue
nire & fraude irretire alterum conaretur
quispiam, nisi esset ipse prius praua illa opi
nionē captus & circūuentus, quærendum
esse quoquomodo auariciæ, libidini, aut
cuiq; cupiditati pastum. Sed hæc consuetu
do atq; exercitatio fallendi alterū, & men
tiendi, his quibus hodie uiuitur moribus,
sic in omnes ferē uitæ sectas ac quotidiana
uitæ officia effusa est & dimanauit, ut an
gustum

gustum admodum inter homines locū ueritati & fidei reliquisse uideatur. PAV. Fer-
tur uulgò quidem ita se rem habere. I A.
Quid nī feratur quod extat ante oculos,
quod eminet. Quis enim est uel paulūm
modo in hāc cōmunis uitāe studia ingres-
sus, qui cum cōmercia hominū inter ipsos
uiderit, qua fide gerantur, non intelligat
quemadmodū gladio in praeliis milites ad
deſciendū capiundū uel hostem, sic frau-
de plurimum & mēdacio uti homines, qui
quidem malitiā quasi gladius est, ad proxi-
mum constringendum, ut supplantato alte-
ro, ad sua quisq; optata facilius perueniat.
Sed quāuis desueta iam hisce moribus ac
temporibus, quibus neglecta atq; posthabita,
tamen quò rarior, hoc clarior est & pre-
ciosa fidei possessio. Licet qui uasri sunt,
astuti, uersipelles, cuiusuis precij homines
ducantur, hisq; à populo plaudatur inter-
dum, & qui callidè cirūuenire aliquem, aut
lepide norunt imponere alicui, omniaq; ad
gratiam & ad uoluptatem agere, in aulis
etiam principum, magni habeantur; tamen
nec unquā tuta, & semper ipsis turpis,
alijs etiam pernitiōsa horum est ratio uitę,

atq; exercitatio: nihil enim potest esse decorum neq; splendidum, neq; idem sibi fides, aut sat munitū aduersus casum, atq; fortunā, unde absit ueritas, quæ cuius insedit in animo, & sancto cum illo foedere copulata, omnium eius dictorū atq; factorum fit particeps, admirabilem quandam illi auctoritatē & speciem præbet inter homines, tanquā mortalī Dei. Debet igitur pater huius posterioris falsi (quādo ad illud maius, quod à philosophia ipsa depellitur, ætas adhuc non est adolescentis) culpam omnē & labem à filio propulsare: monereq; & præcipere diligenter, ut ne unquā inducat animū aliud sentire intus, aliud loqui. Sed in puero facilis est præceptio, neque enim multum malicia illa ætas peccat: cum adolescēte iam facto, accuratius est insistendum, ut animaduertat, sibiq; persuasum habeat, neq; uirtutis uim, neq; exemplū optimi moris, nec uerō honorem illum qui ab equalibus expetitur, nec dignitatē, ad quā omnia cōsilia diriguntur, sine fide & integritate cuiquā cōstare posse: ut assuescat abhorrere à mendaciō, & lingua habeat semper cordi consonantem: nec solum in

uerbis & sermonibus ad alterū, recta, uera,
 simplicia discat loqui: sed in consilijs & fa-
 ctis nihil fictū, nec fallax, nec simulatū ha-
 beat: quo enim facta uerbis potiora sunt,
 hoc magis in ijs quàm illis mentiri decipe-
 re; est dedecorosum; mentiuntur autē qui
 uersutiloquis (ut ille ait): malicijs, honestam
 speciem uirtutis parum honestæ præten-
 dunt cupiditati, neq; ad ueritatem referūt,
 neq; quia ita decet, neque quia ita rectum
 est, sed inclinant & uergunt ad alterum ali-
 quem finem: qua quidem e mentita uirtute
 nullum uitium est monstruosius. Atq; horū
 quidem illa obstructio simulationis neque
 diuturna est, & ab acutioribus statim per-
 spicitur, dant enim manus, oculi, uultus, ce-
 leriter aliqua signa: nec unquàm usque eò
 oculi & abscondi potest ueritas, ut non
 emergat aliqua, atq; appareat: ubi uerò de-
 prehensi sunt, & persona detracta pducti
 in publicū, maiore in uituperatione igno-
 miniaq; uersantur, quàm si uitium palàm
 ex initio fuissent professi. Atqui ex fide
 bona adolescens studuerit uirtuti, decusq;
 & ornamentum uitæ à ueritate sibi duxe-
 rit, nullum unquàm locum simulationi &

mendacio in moribus suis esse sinet: nisi ioci interdum causa: cum non fraus fuerit, sed lusus, atq; id tamen parce & molliter, ut ne lædat eū cui uult illudere: scitè enim & aptè scire hoc agere, condimentum est nōnunquā sodalitij & familiaritatis: nec nos austerum, aut tetricum, aut difficilem esse adolescentem uolumus, sed hilarem, & comem, descendentem ad omnia quæ illa ætas natura fert, modestiam tamen & mediocritatem secum deferentem. In eandem quoq; mēdaciij & simulationis affinitatem transit imitatio: quid enim aliud est imitari, q̃ capere similitudinem eius quod non sis. Sed hoc si fiat in eam partē, ut effingas imitādo quæ recta honestaq; sunt, ut si eius gestum uultumq; imitēre, qui dolorem corporis fortiter tulit, aut in uoluptate fuit temperans, aut amissam iam acie restituit, referas eum uoce, motu, corpore, laudabilis est imitatio, nec ueritatem reiñciens illa, sed aduocans: quemadmodum etiā nostra hæc de qua disseruimus, probata domi disciplina, ueræ uirtutis dicta est imitatio. Si uerò imitationem conuerteris ad deteriora, & aliquos mimorum motus, uultusq;

scurrarum

scurrarum, eorumq; dicta & facta, captandi
 risus gratia, uolueris imitari; nihil est hoc
 genere ludendi illiberalius, nec quod pu-
 dori & modestiæ magis cōtrarium sit; ex-
 tremæ enim impudentiæ est, adde etiam si
 uis stultitiæ ac leuitatis, uelle deridiculum
 esse; nec aliquid bonæ indolis residere in eo
 potest, qui id agit ipse ut rideatur. Sed ut
 hoc turpe & sordidum lusionis genus rei-
 cimus, sic multas relinquimus adolescenti
 lætitiæ & hilaritatis uias. Decet enim ado-
 lescentem, hunc, quem nos instituimus, ita
 studere præstare cæteris in omni ornamen-
 to honoreq; uirtutis, ut ad illa, quæ sunt
 adolescentium cōmunia, cum paribus suis
 æqualiter se dedat; currere, saltare, ludere,
 eos utiq; lusus, quibus cōpus exerceatur;
 choreas ducere interdum, cōuiuium habe-
 re, cachinnari aliquādo liberius, iocis & di-
 ctiis hilaritatē accersere, sed ut seruet in his
 quem sepius diximus modum, in quo ipso
 inest id quod decet; quod non erit illi diffi-
 cile notare ab illis patrijs institutis, discipli-
 naq; domestica; per quam sensim illa diui-
 na decori species moribus eius adlita &
 insinuata fuerit; Consequetur autē ex his,

ut cum propter facilitatem, humanitatem, comitatemque naturæ plurimum eum sui æquales diligant, tum uerò propter uirtutem, integritatem, elegantiam morum, etiam cum quadam illum admiratione uenerentur : summamque habeant illi omnium rerum fidem, & propè uoluntarii illius sese imperio subiiciant, multi etiam ut studeant imitari : & quidem omnes ferè ex quotidiana consuetudine atque usu, aliqua ex illo uirtutis lineamenta in suos mores transferent : nonnulli uerò accedent propius, & similes fieri conabuntur, ut quod alias diximus, & dicendum sæpius est, perfacile possit iudicari, quantum sit bonum euenturum ciuitati, primum si puerorum recta educatio publice excolatur : Deinde ab unius sæpe bene instituti adolescentis imitatione atque exemplo. Quod potuisti modo in te expertus commodè existimare Paule, cum enim in te unum spectet iuuentus nostræ ciuitatis, cunctaque sese ad te applicet & familiaritate tua maiorem in modum gaudeat, potuisti reprimere pauloante maledictiam, quæ increbuerat in iuuentute tam prompte de altero & tam libenter detrahendi : à

quo

quo more cum pro natura tua abhorrens ipse, comiter ab ijs petiſſes ut abſtinerent, facta eſt iuuetus tua opā modestior. PAV. Equidem quid egerim nescio, nec si quid etiam ago, id mihi pater tribuēdum eſt, ſed tibi; ueruntamen illud & cognosco & fa-
 teor, plurimum in eo fore ornamēti & cō-
 modi ciuitatī, si iuuetus bene inſtituta ſit:
 quod ut contingat, utinā ea omnes, quam
 tu mihi modò præſcripſiſti, utantur disci-
 plina: quicūq; ille quidem extiterit ſic edu-
 catus atq; alitus, hic maximum habiturus
 eſt profecto Deorū immortalium erga ſe
 beneuolentiæ teſtimonium. IA. Nimirum
 ita eſt Paule, orandusq; Deus, ut quāmplu-
 rimos uelit ſue huius benignitatis eſſe par-
 ticipes. Verum nos hoc trāſactio bonorum
 morum & disciplinæ rectæ curriculo, rur-
 ſus alium curſum ueluti reprehēdentes ad
 caput & pueritiæ principia iam tertio re-
 deamus. PAV. Nempe ut quæ literarum
 iam & doctrinę ſunt, artiumq; earum quas
 uocamus optimas, eorū ornatu & ordine
 inſtituas adoleſcentiam? IA. Næ: atque ut
 ubi uera reſidet uirtus, non ubi imitatio a-
 gitur uirtutis, eam illuc deducamus. PAV.

A' Dñs penatibus ad Apollinis & musarū uidelicet. I A. Quid si ad eam sapientiam potius, quæ è capite patris prognata, & eodem amoris spiritu cum patre ipso nexa atq; concors, ad omnem mortaliū illustrandam uitam olim egressa est, & cum nihilo minus permaneret in patre, ad nos se cōtulit, ut abiectos humi, & nil sublime meditantēs, ad cōlestium bonorum, & certā immortalitatis spem excitaret: huic enim debetur quodcunq; perfectū est, quod in trinitate potissimè est spectandum. P A V. Sic quidē oppidò melius, sed ego latino more locutus sum. I A. Quod quidem ego minime reprehēderim Paule; dare enim aliquid stilo & cōsuetudini eius linguæ, in qua uelis loqui, concessum sanè est: Sicut & nos ubi de diuinis nominatim non agitur, figuras illas & modos Latinæ dictionis ad illuminandam orationem non inuiti adsciscimus; ut mehercule interdum dicamus, mediūsfidius, Deos etiam immortales pluriū numero nonnunquàm proferimus, nō sensum ex his uerbis ullum, sed sonum dūtaxat quærentes, atq; ut splendidior & fortior, nec abhorrens ab ipsa antiquitate pcedat ora

dat oratio: quando ea quidem suis ornata atq; instructa dotibus, ad docendum quid uerum, sanctum, rectumq; sit, & ad impellendum in id quod conueniat agi, maius multo pondus & maiorem quandam uim affert. PAV. Nauiter studendum est igitur orationi, & stilo, ut te intelligo loqui, IAC. Et maximè quidem si quid agere aut perficere uis quod sit egregium: nam philosophia, & quam præcipuè quærimus, uirtus ac sapientia, si tibi tecum uiuendū esset soli, forsitan se una contenta foret, neq; requireret quicquàm amplius. Cum uerò tibi in coetu hominū, & cum plurimis uiuendum sit, omniumq; studiorum, utilitatū, officiorumq; & tuorum cum illis & illorū tecum cōmunicatio faciēda, ad hanc humanæ uitæ societatem apte cōmodèq; gerendam, nullum instrumētum est oratione præstantius. Itaq; & facio sæpe, & facturus sum, ut te adhorter imprimis ad hæc studia, quibus dicendi egregia & præstans ratio comparatur: hoc etiā studiosius, quòd me quantum proficias, & quid mihi spei præbeas nil pœnitet. PAV. Faciam equidem quod meum est, ut labore & diligentia tibi satisfaciam

faciam mi pater: quantũ uero effici per me possit, totum tuo iudicio permittam. I A. Dabitur hac in re opera ab utroq; nostrũ Paule, ut recte sit. Sed nos aliud initium nostri sermonis facientes, redeamus ad eandẽ pueritiam de qua totiens iam iterauimus loqui: ut eam alio quodam itinere, alia semita ad indagandum melius uirtutem deducamus: nam quæ adhuc de uirtute dicta sunt, et si uerissima ea sunt, creduntur tamẽ à iuuenē, non intelliguntur. Hic autem tertius quasi actus nostræ deductionis reliquis perfectior, in eum locum adducet adolescentiam, unde non alienos imitari gressus, sed ipsamet cernere quo & qua uadendum sibi sit tãquàm è specula poterit, suiq; erit consiliũ domina & uoluntatis. Igitur puerum ut primum fari cõmode, & uerba diserte proloqui poterit, aliquosq; ingenij coeperit igniculos iacere pueriles, studiose inducat pater in opinionem & desiderium addiscendarum literarum: quod perquàm apte fiet, si accersendis maiusculis pueris, qui iam aliquantum in legendo p̃fecerint, & illis auscultandis, laudauerit presente filio recte recitantes, exosculatusq; fuerit,

aliquid

aliquid etiam dederit muneris ac præmij: mouebitur enim animus filij ad eadē æmulanda studia, in quibus alterum sic probari perspexerit: ipseque ultrò petet, ipse flagitabit easdem sibi tabellas, & eandem exercitationem dari. Quæ dandæ erunt, cum ornata ipsæ & cōcinnæ per sese, tum illustribus scriptæ literis, ut omnibus rebus, quibus capi potest illa ætas, ad amorem & cupiditatē legendi perliciatur. Semper enim providendum diligenter est, ut literarum desiderium ita antecedit in puero, ut nunquam satietas nimia consequatur. Sed etsi pater eiusmodi sit, ut omnibus ipse optimis artibus literisque eruditus, docere possit filiū, & præclare eum in omni doctrinæ genere instituere, censuerim tamen idoneū illi magistrum esse eligendum, qui huic uni uacet negocio, nullaque omnino re alia, neque occupatione teneatur, sed sit in hanc curā erudiendi filij totus intētus, à qua patrem sæpe familias, tam forensibus quam domesticis negocijs necesse est auocari: hanc nostram de adsciscendo liberis magistro sententiam M. Cicero comprobat, qui cum ea esset ingenij, literarum, & omnis scientiæ gloria

tia gloria, ut locupletasse ipse & ornasse potius eloquentiam,quàm ulla ab ea ornamenta sumpsisse uideretur,in erudiendo tamen filio alienis magistris usus est;uerum hoc quod facile est præceptu atq; imperatu, re ipsa & experiundo uehemēter fit difficile. Rari enim sunt, utinamq; adeo rari isti, aliqui tamen essent, qui comprehendissent animo, quid sit uere sapere, & uinculum illud quo omnes humanitatis artes inter se continentur, ad cuius unius sapientia spem & alimus & cōstituimus filium, quale sit tenerent: neque ij aut ostentandi sui causa, aut lucri faciendi, aut popularis auræ colligendæ, ad singulas addiscendas sese dederent artes: si tamen addiscere est ignorare, quem ad finem percipiendum sit quod addiscas. Sed quoniam de hoc errore uulgato & prope cōmuni in nostro de laudibus philosophiæ libro satis est dictū, & alibi sæpe dicetur, reuertamur ad puerum eum quem in manibus habemus, magistrumq; illi præficiamus è literario ludo, cuius mores probati sint, & diligentia in docendo cognita: qui ita quotidianū pensum legendi & scribēdi à puero exigit, ut nulla

in re sit asper, nec minis, aut uolentia utatur; summopere enim cauendum est, ne eas literas odisse incipiat puer, quas nondum potest ipsarum causa diligere: spe ille potius & laude prouocandus est, interdumq; ex pacto agendum, ut cū plures horas sibi ipse sumpserit ad pueriles obeūdos lusus, unam aliquam præbeat magistro. Legendi ergo & scribendi prima præceptio est pueritiæ, & primum rudimentum: quod prompte & celeriter facere debet puer, ac sine ulla dubitatione uel minima nosse literas, uel ipsas per sese, uel in syllabis dictionibusq; cōiunctas; nec nosse solum sed pronunciare commode sono uocis simplici rectoq;, literis neq; oppressis nimium, neque expressis; itemq; perlegere cursim quicquid scriptum oblatum fuerit: idq; & prorsus & rursus retro contraq; reuoluere: hæc enim quæ minima uidentur, tamen quoniam fundamēta sunt cæterorum, firmitus sunt statuenda, immorandumq; in his aliquantō diutius, quoad planè resideāt, atq; comprehendant. Quod autem de literis, uel de literarum potius elementis ac notis dictum est, nō de latinis tantum, sed de Grecis quoq;.

cis quoq; uolumus intelligi; harum enim utranq; linguarum ab eo uolumus addisci, qui ad eximiam spem summæ uirtutis alatur; utriusq; enim maximî & doctissimî auctores sunt, omniaq; doctrinarum genera in utraq; egregie sunt tradita; tū autem prudentiæ, sapientiæ, eloquētiæ utrobique summa uis, & ita nexa inter se, ac mutuo se continens, ut qui alteram sine altera perceperit, debile quiddam & mancum esse adeptus uideatur. Ad utranq; igitur & Græcam & Latinam orationem legēdis & scribēdis lītēris statim de principio imbuendus est puer; in quo illud primum admodum occurrit laudabile, quod est in more positum, ut simul cum literarum notis, elementa quoq; Christianæ religionis in puero insinuentur; nam, ut dictum est, nec uirtus, nec doctrina, nec spes honestæ aut beatæ agendæ uitæ ulla est, qua non pertinet, nec comes est religio; grauesq; tum sententiæ summorum auctorum proponendæ illi sunt, ad sanctitatem uitæ, & ad exemplum fugiendarum aut expetendarū rerum pertinetes, quas animus tener bene apprehendat, deferatq; secum in omnem posteriorem

uitam

uitam. Sed hanc consuetudinē legendi iam scribendiq; familiariter sequitur continuo grāmaticæ ars; cuius nomen ductum quidē à literis, tenuem uidetur habere appellationem, sed est eius facultas uberior: non literas enim solū, & nomina, uerbaq; ac reliquas omnes orationis partes, sed poetarum quoq; & oratorum cognitionē ita complectitur, & pertractat, ut paruum in ijs relinquere uideatur uelle alijs artibus quibusdam locum: quod meo est animo nō tam grammatices proprium, quā eorum qui ad suam ex alijs generibus facultatem doctrinamq; ostentandam, huius artis nomine abuti uoluerūt. Scripserunt enim de ea complures docti uiri, cum Græci, tum Latini: sed aliq; alio modo, pressè castigateq; nonnulli, multi abundantius: nisi fortē necessario credimus tria millia librorū amplius à Didymo in arte grammatica fuisse scripta. Apollonius in Græcis, & Herodianus probatiores: magnā laudem apud nostros meruit Donatus, & qui illū Seruius æmulatus est: tum deinde multi. Sed nostrum nō est enumerare scriptores: potius illud uideamus, quomodo & quatenus

grammaticæ tradenda puero est: neq; uim artis totam, sed captum ætatis illius consideremus; nam si qua sunt in illa arte difficilia & ardua, non tam necessarijs quàm subtilibus implicata disputationibus, reijciantur in id tempus, cùm alijs pluribus disciplinis instructus adolescens, ocium contemneret in huiusmodi quæstionibus poterit: quæ tunc ultrò sese illi offerent, & ex aliena quadam facultate acutius disceptabuntur: tenerum quidem pueri animũ onerare his difficultatibus, nullius consilij est. Quid enim illi proderit nosse cõtrouersiam, utrũ participium sit pars orationis, an redigatur sub uerbo: & utrum uocabuli an nominis in rebus appellandis potior usus sit: & similia multa, quæ ne intelligentibus quidem admodum uisui esse possunt? Potius mihi is ad illa aperte & simpliciter perdiscenda ducatur, quæ necessariam habent utilitatem, ut literas distinguat, aliasq; nouerit uocales, quæ purum ex se proferant sonum, alias consonantes, quæ cùm illis iunctæ & compositæ sonent, rursusq; ex consonantibus semiuocales, quarum sonus incipiat à uocali; cæteras mutas, in quibus uocalis

calis sonus tantum definit. Intelligat etiam
 bissonas, quas *διφθέρυγες* Græci, ex duabus
 uocalibus esse compositas: tum his adiun-
 gat omnibus pronunciationem congruā.
 Ad dictionū uerò syluam ita traducatur,
 ut sine ulla ambiguitate addiscat octo illas
 peruulgatas orationis partes: quarum sin-
 gularū proprietates, & quasi insignia quę-
 dam, debet cognoscere, ut sciat internoscere:
 ut uerbi causa, Nomen esse quod rei natu-
 ram aut qualitatem denotet in suo statu ma-
 nentem, idque casibus deflecti, speciebus di-
 uidi, numeris mutari, generibus uariari, fi-
 guris distingui. Verbum esse, quod rem in
 motu aliquo signet uel agendi uel patien-
 di, in quo pro casibus sunt temporum fle-
 xiones. Participium, quod affine utriusque &
 uerbo & nomini: tempus & motum acci-
 piat à uerbo, in reliquis sequatur nomen.
 Pronomen uerò quod uicem præbeat no-
 minis, in ijs nominibus scilicet quæ pro-
 pria sunt, & certam personam aliquam in-
 dicant. Aduerbia porro & præpositiones
 illa, quod nisi uerbo adiuncta uim habent
 nullam, hæ uel nominibus separatim appo-
 sitæ, idque ferè semper præeundo atque antece-

dendo, unde nomen naclæ sunt, uel etiam cum his & cum uerbis in compositione copulatae augent, uel minuunt, uel uertunt sensa eorum, quibus cum componuntur. Coniunctiones uero, quod superiores quinque partes orationis binas trinas uel adhæ rescendo coniungant. Interiectiones è contrario, quod cursum & sensum clausulæ interpungunt aliqua uoce humani affectus indice interposita, quæ habeat spem, lætitiā, metum, dolorem, alacritatem, admirationem, & similia quædam. Sed hæc, quæ in puerili disciplina commodius traduntur, perstringenda tantummodo nobis sunt, indicamus enim iter duntaxat, non disciplinam ipsam tradimus. Sequuntur flexiones quatuor primarum partium orationis, quarum tres casibus, uerbū ipsum temporibus tantum inclinatur, quæ probe & penitus memoriæ mandandæ sunt: earumq; uarietas facillime est & familiarissimè discernenda: tum autem qui cuiq; uerbo casus subsequatur, qui uel antecedit, hæc enim summa est meo quidem animo grammaticæ facultas, scire ita struere & contexere orationem casibus, numero,

genere

genere, temporibus, ut nihil sit perturbatum, nihil non concors, nihil non inter se apte cohærens & consonum, quod tam in uersibus, quàm soluta oratione tenendum grāmatico est: est enim & huius artis propria quantitatis syllabarum notio, & quis cuique carmini pes conueniat, nam uerborum & nominum quæ comuni analogiæ præuaricata sunt, & discrepantes à consimilium cæterorū ratione induere formas, usus & cognitio, non tam scrupulosis anxijſq; præceptis, quàm ex bonorum auctorum crebra lectione percipiēda est: quod idem de recte scribendi scientia, quæ Græcè orthographia est, dicimus: hanc enim onerosam & difficilem pueris ad noscendum, si per regulas præceptaq; tradamus, assiduus legendi scribendiq; usus melius confirmat, & in uniuersum tota grammaticæ ars plurimum communi consuetudine loquendi, & ueterum doctorum auctoritate nixa est: cuius extremum & finis est scire apte construere, & coagmentare orationem, ut nihil discors in ea, neq; præposterum sit: idq; tum fusa oratione, tum carmine, in quo syllabarū præterea quan-

titas expendatur. Hoc cum efficere poterit puer prompte & paratè, atque ut in agendo nihil hæsitet, est enim propterea quod hæc ars fundamentum est, & ueluti solum reliquarum artium, ut si ea debiliter comprehensa sit, omnem superextructionem nutare oporteat, diligentius in ea elaborandū, optime ut teneatur. Cū inquam fuerit hæc puero bene percepta, & cognita, tum audentius quicquid libuerit oneris est illi imponendum; nam & ipse his nodis & minutis difficultatibus expeditus, quæ laborem animi in puero non mediocrem, delectationem habent propemodum nullam, tanquā equus modo domitus gestiet in campos procurrere liberiores, & suarum uirium, suiq; ingenij aliquod periculum facere: ita quæ sequuntur iam non laboriosa illi, sed grata iucundaq; erunt. Igitur è uestigio ad exercitationes & præcepta artis rhetoricæ traducendus est: cui eadem quidem quæ ipsi grammaticæ subiecta est materia, nominum & uerborum uidelicet, & omnis formandæ componendæq; orationis, uerū alio modo. Illa enim, ut diximus, sat habet struere aptam inter

se & congruentem personis temporibusq;
 orationem, aut carmen suis pedibus & nu-
 meris integrum componere, eoque functa
 officio quiescit, nec habet causam ulterius
 progrediendi. Rhetorica uerò hoc qui-
 dem accipit ab illa, tanquam sibi necessa-
 rium, sed nulla est in necessarijs dignitas.
 Itaque sic excolit acceptum atque exornat,
 ut illo apparatu instructuq; orationis ni-
 hil fieri possit admirabilius. Hac de arte
 plura dicenda essent, quippe è qua tantum
 sit humanæ uitæ ornamentum, nisi in Ci-
 cerone præclarissime expressa essent om-
 nia: quem & meo hortatu, & uoluntate
 tua assiduum in manibus Paule geris: hic
 enim tibi & nunc, & postea, & semper le-
 gendus est: nec legendus solum, sed om-
 nibus intimis sensibus & modis deuoran-
 dus: nulla est enim laus prudentie, nullum
 lumen orationis, nulla sententiarum di-
 gnitas, nulla uerborum, nullus in dicen-
 do lepos, nullum acumen ingenij, nulla uis
 animi, quæ non in eo non dicam appareat
 atque extet, uerum ita emineat, acrisq; ad
 permouendum uehemensq; sit, ut torren-
 te quodam omnium suauitatum obruat

sensus animosq; legentium. Sed etsi in hoc uno omnia insunt, quæ ad huius præclari generis facultatem uidentur esse requirenda; prætereaq; & doctrinæ & sapientiæ maxima cum his coniuncta uis: tamen ubi te ad huius imitationem conformaueris, neque colorem solum, sed succum etiam & habitum illius orationis fueris nactus: tum legendi cæteri quoque tibi sunt auctores Latini, Græciq; tum oratores, tum etiam poëtæ. Est enim huic ætati, in qua tu es Paule, & uerò etiam consequenti magno ornamento simul & emolumento, uidere multorum ingenia atq; scripta: quòd & multa addiscuntur à multis, quæ ad usum & manum quotidie opportuna accidere possunt: & lectio uariâ ac multiplex iudicandi uim prudentiamq; confirmat: quæ si in uno duntaxat genere uersetur, nec habeat quî cum quid compareret, non delectu ullo ad id se applicuisse, etiam si sit optimum, sed casu & fortuna in illud solum incidisse uideatur. At nos delectu uolumus & iudicio ualere uel maxime eius adolescentis naturam, de quo iam dudum insistimus loqui: quanquam non est

adolescen

adolescentiæ iudicare, uigere ingenio illi
 ætati potius conuenit: porro autem inge-
 nij est cum percipere celeriter id quod tra-
 datur, tum uerò arrepto à demonstrante
 principio, præcurrere aliquantū, & ex pau-
 cis statim plura aliqua intelligere: qd' quis-
 dem eximium, imprimisq; optabile Deo-
 rum immortalium in nobis donum est: ius-
 dicandi autem ipsa uis, non tam celeritas
 tem, quàm pondus habet, neque in præui-
 dendo magis, quàm in circumspiciendo est
 posita: ex multis enim circumcirca sese of-
 ferentibus eligat illud oportet, quod ma-
 xime sit accommodum: quod quidem fie-
 ri sine comparatione plurium non potest:
 quam nobis probādi & adsciscendi potio-
 ra facultatem usus rerum multarum, & in
 hominum consilijs, fortuitisq; euentibus
 longa agitatio, imprimisq; lectio erudita
 & uaria affert: neque tamen absque illo na-
 turæ munere, quo bono ingenio præditi in
 lucem uenimus: nam si ingenium absit,
 pro nihilo cuncta sunt: ut naturam ubiq;
 præcipue dominari appareat. Sed etsi non
 est iudicatio propria adolescentiæ, eis ta-
 men armis, & eo cultu comitatuq; rerum

illa ornanda ætas est, ut cum maturum fuerit, acute queat & recte iudicare : in quo maximam partem literarum scientia adiuuabit, & cognitio uetustatis, & lectio quam plurima summorum probatissimorumque autorum, quorum nemo est aspernandus ex his, quos iniuria temporum de multis reliquos nobis fecit : nec solum egregia utilitas, sed maxima quoque delectatio ex illorum lectione uaria percipietur. Iuuabit cognosse ac mirari unam illam incredibilem uehementiamque Demosthenis: cuius oratio sic sensis inter se, quasi hamis, conferta esse mihi uidetur, ut si literam unam tollas, seriem totam labare sit necesse : ita quidem est pugna, ut semper uincere : ita plena ac referta, ut obruere : ita arguta, ut nunquam non decipere aduersarios possit : quam crebra præterea in ea prædicatione antiquitatis, qui delectus uerborum ac sententiarum, quam multæ ad laudem & ad decus sumptæ ex tempore & ex causa cohortationes : ut merito huius unius principis in dicendo gloria Graiae gentis eloquentia nitatur. Huius inimicus & in re publica aduersarius Aeschines toto genere

omissior

omissior, canorum tamen habet quiddam
 & profluens. Subtilis Lyfias & uerbis ma-
 xime proprius. Nam Ifocratis eloquens-
 tiam probatam alioquin, nimiae concinnis-
 tates, & quaedam quasi delitiae, ut minus
 uideretur uirilis efficere. Horum & cæte-
 rorum, ut dico, crebra lectio nō solum uo-
 luptate afficit cognoscendis summorum
 hominum ingenijs ac dissimilitudinibus,
 sed auget etiam facultatem inter dissimi-
 lia & uaria genera dijudicandi. Quod idem
 de rerum gestarum scriptoribus est dicen-
 dum, quorum nostris mehercule non mi-
 nor est quàm Græcis aut elegantia aut co-
 pia: atque in his aliquantò etiam expres-
 sius apparet, quod ad confirmandam pru-
 dentiam hominū pertinet: ueterum enim
 ducum, & eorum qui in gubernatione re-
 rum publicarum floruerunt consilijs a-
 ctisq; perdiscendis, & quid cauendum in
 uita, & quid sectandum sit ex euentis illo-
 rum facile intelligitur. Quid de Poëtis di-
 cam: quorum cernis profecto & quæ in
 utraq; lingua copia, & quanta non solum
 ad demulcendos, uerum etiam ad impel-
 lendos animos nostros uis sit: atque hoc

genus

genus sanctum, & Dñs amabile semper habitum est: non enim tam studio humanae ue cogitatione, quàm spiritu quodam diuinitus inflati, uidentur illa effundere, quæ sonis numerisque constructa aures sensusque corripunt: & ad permiscendos animos nostros tanquàm illiquefacta funduntur: ut in quancuncque impulerint partem, non uideatur posse obfisti. Quo etiam ex illa Platonis repub. quam is in libris perfectam condidit, poëtæ exire iussi sunt, ne suad suum arbitrium, & quodcunque eorum animis libuisset scribere ac diuulgare aggressi essent, quod in communi liberum erat Græcia, ciuium suorum mores facillime corrumperent: & re uera plus est in hac facultate momenti, quàm quisquam forte suspicetur, tum ad frangendos, atque eneruandos uoluptate, aut cæteris per motionibus animos, tum rursus ad eosdem uirtute & constantia corroborandos. Sed quoniam hoc uidetur esse communis Musicæ officium, cuius pars uel præcipua poëtica est, eaque adeo sedes & basis, qua tota ars Musica collocata est & sustinetur, de ea est aliquid dicendum, si quid nobis

uelimus

uelimus hoc cursu & hac commemoratione artium ingenuarum, & quem ad finem contendamus prius exposuerimus. P A V. Equidem pendeo animi quo tu loco statuas esse Poëtas, & illam Platonis sententiam pertimesco; sed tamen cum recôrdor me te autore cum illis uiuere iamdudum familiariter, eosq; sæpius in manibus habere, consolor ipse me, nec uereor ut tu mihi illam uel oblectationem & requiem à seuerioribus studijs, uel etiam ut ego experior non mediocrem utilitatem ad linguam & uitam excolendam, adimas; nam si quis mei ingenij captus est ad ista expendenda, in quibus tamen quotidie uersor, nec intelligo quid Homero uberius aut magnificentius legere possim, nec quid Virgilio diuinius: qui duo cum sint non singulorum sæpe hominum studio solum, sed ipsarum nationum contentione inter se cõparati, utri dandus sit in hac laude principatus, soleo crebrò usurpare sententiam tuam; qui sic dicere es solitus, plurima esse in Homero quæ in cœlum tolli, nihil in nostro quod melius possit optari; ab illo tamen tanquàm fonte & patre omnium do-

Strin

ctrinarum ceteros ueluti riuos fluxisse putas. Nam quòd comœdiam sæpe affirmas priuatæ uitæ & ciuilis consuetudinis esse magistram, speciem habet, ut ego arbitrator, hos quoque poëtas non repudiantis: quorū Terētius ceu sedatus amnis quemadmodum fluat pure & leniter, nihil secum turbidum neque fucatum deferens: ut que se accommodet ad omnia quæ incidunt, apte, scite, eleganterq; & narranda & respondenda, quis legens non cum quadam animi delectatione miretur? in quo mihi uidetur habitare ipsa modestia: sic enim cauet ab obscœno spurcoq; ut interdum quid quanque deceat personam parum attendere uideatur. Plautus fortasse licentior: sed tamen quid eo ad locupletandam latinam orationem & facilitatem sermonis copiamq; uerborum, potest esse utilius? De poëtis cæteris non loquar, quorum est & Græcis & Latinis festiua copia: plura enim genera poëtarum habentur, quod in oratoribus fortasse non ita est. Sed hoc dicam communiter de uniuersis, cum sit aliquid in unoquoque quod excellat in aliqua ingenij parte, & in plerisque laudabilis

bilia permulta, non uideri hoc genus ab
 institutione bonorum morum & à studijs
 doctrinæ eius quam expetimus repellens
 dum esse. Quòd si fortunæ & temporis ini-
 quitas aut nobis in uetustis conseruandis
 autoribus tragœdiam reliquisset, aut non
 ademisset Græcis comoëdiam, magnam o-
 pinor uoluptatem ex Græcorum & Latî-
 norum inter se scriptorum contentione ca-
 peremus. Sed quando hoc nobis bonum
 ereptum est, siue hæc hominum iniuria fue-
 rit, siue temporis, ex alternorum tamen
 lectione licet animaduvertere, quæ sit utri-
 usque generis uis, quanquàm tragœdia
 fortè turbulentior, & ad concitandos di-
 uersis affectibus animos non parum cer-
 te potentior. I A C. Polite ista admodum
 & perquàm commodè Paule; itaque gau-
 deo tua ista in expendendis scriptoribus
 Cræcis & Latinis attentione ac diligen-
 tia, in qua specimen nobis eximiũ tui in-
 genij præbes; mihi quidem non paruam
 laboris partem ademisti in discernendis &
 dijudicandis poëtis, nam hos modo quos
 commemorasti, & alios ferè horum simi-
 les non legendos solum, sed habendos tibi
 perquàm

perquàm familiareis puto : nec usque eò
 Platonis illud interdictum horreo , ut non
 putem bonū morem potius poëtis , quàm
 poëtas bono mori legem esse laturos , Sed
 tamen neque ille in eo statuendo non ali-
 quid secutus est : & nos te nolumus in nu-
 mero ducere poëtarum sotadicos istos im-
 puros uersificatores , qui ad omnem petu-
 lantiam progressi , omnia scurrilibus pro-
 bris referferunt . P A V . Nequaquàm mi-
 pater , intelligo enim quos dicas , nisi si
 quando illi legendi sunt , ut excellentium
 & grauium poëtarum uirtus & sapientia
 manifeste luceat . Sed quod de Musica te uel-
 le disuti dicere , id ego audire sanè aueo .
 I A C . Quippe qui in hac arte patris tui
 cura apprimè à pueritia instructus fuisti .
 Sed ego non ea dicam quæ huius uulgatæ
 & triuiualis Symphonix sint , cuius auri-
 bus tantum suauitate demulcendis omne
 est lenocinium , & quæ in sola penè uocum
 flexione ac modulatione ipsa consistunt ;
 hanc enim uelut bonis moribus inimicis-
 simam iure & ab repub. sua exclusit Pla-
 to , & in suas ciuitates Aegyptij nunquàm
 admisere . Sed dicendum est de uera Mus-
sica

fica, cuius animis ab agresti illo rigidoq;
sensu ad urbanitatem reflectendis, & eis-
dem rursus ne mollitia nimia perfluant,
uirtute & constantia uinciendis, totum of-
ficium est: & quoniam diximus esse quid-
dam quod anteuertendum primo nobis
uideretur, sic habeto; cum, quemadmodum
in stadio fieri solet, nos in hoc disciplina-
rum & artium ingenuarum ueluti decur-
su quasi è carceribus deducamus adoles-
centiam, ut eam in loco ubi est præmium
certaminis positū sistamus: summum esse
illud & extremum quo tendimus, ipsam
illam de qua totiēs iam locuti sumus, per-
fectricem naturæ humanæ ac rationis &
beatæ uitæ largitricem philosophiam: ad
quam cum fuerit peruentum, constituen-
da in ea sedes est, & omnium consiliorum
collocādum domicilium: quippe cum nec
quod ad salutem nostri, tranquillitatemq;
pertineat, nec quod ad sani animi pluri-
mas capiundas uoluptates utile sit, quic-
quàm ibi possit deesse: porrò exorsus hu-
ius nostræ deductionis grammaticæ ipsa
extitit: è qua cum tantum institeris in ea
quantum fuerit necesse, ad ornandam &

excolendam, alia quadam arte & doctrina orationem discedendum est, cuius imprimis necessariae & maxime præclaræ facultatis studium in omnem reliquam deinceps uitam pertinere debere diximus: tanquàm sine qua magnus uir quispiam, & inter cæteros gloria eminens nec domi, nec uerò etiam belli existere facile possit. Verum etsi hanc exercitationem grauius, distinctè, ornateq; differendi, qua de re cunque fuerit propositum comitem adolescenti, in omnem ætatem tradimus, ut cum unà cum eo ad philosophiam tanquàm ad mare flutius peruecta fuerit, coalescat cum illa in unum quasi corpus & confluat: sic eam uolumus aliarum artium ac disciplinarum, tanquàm aquarum & fluminum accessu, uberiores fluere. Itaque nulla est earum artium, quæ liberales sunt, & ingenio homine dignæ existimantur, non suscipienda adolescenti quatenus cōmodum sit, hoc est ut tantum in una quaque ponatur temporis, quantum fuerit satis, nam neque erit negotium difficile, & illæ tamen societate & consensu quodam nexæ inter se & colligatæ sunt, ut qui in unam peni-

tius

tius intrarēt, facilem sibi aditum patefaciat ad cæteras. Itaque antiqui illi Græci, qui hæc curiosius & in maiore ocio quàm nostri tractauerunt, cum cernerent ad perfectam summamque sapientiam, quam illi in gubernatione rerum publicarum: & in excellendo ac præstando cæteris hominibus consilio ac eloquentia positam arbitrabantur, iter esse per huiusmodi artes, præceptores quidem dicendi simul & sapiendi, quos illi Sophistas uocabant, quasi ciuilis prudentiæ magistros, impenso conducebant precio liberis: ut affixi illis semper, ab eorum latere nunquam discederēt: ad alios uerò doctores Geometras, Musicos, Astronomos, filios tanquàm deambulatum iubebant duci: apud quos tamen aliquid reperirent quod operæ præcium esset addiscere. Sed cum ætas puerilis & paulò etiam magis adolescens plurimo igni citata & uiuida, quiescere nullo pacto queat, semperque in agitato motuque sit, nec garriendi, cursandi, clamandi constituat modum, quas putauerunt artes regendæ illi ætati & temperamento quodam fingendæ idoneas potissimum esse, eas primas adhibue-

runt, gymnasticam uidelicet & musicam, quarum altera corporis in puero motus, altera animi, effusos ipsos per sese & immoderatos, sub leges quasdam redigeret: ut cum suos naturæ cursus impetusque permisisset, affingeret tamen quiddam ex arte & disciplina, quod cum uenustatem omnibus illis motionibus, tum corpori ualitudinem, animo modestiam præterea posset afferre. Ac quod ad corpus quidē & eius exercitationes attinet, permulta ex illo antiquo usu contraria consuetudine sublata sunt: non enim nos neque frequentibus balneis utimur, neque quotidie lauamus, quod illi studio faciebant: nec oleum iam diu aut palestram ullam nouimus: tantum quæ erant Romanæ exercitationis, propria in nostris moribus remanserunt, pleraque equitare, currere, pila ludere, iaculum mittere, certare rudibus, & si qua eiusmodi sunt ad laborem corporis ualitudinemque spectantia, quæ non tam sunt artis, quam studiij: & in quibus decor omnis accersendus est, non à præceptis magistri, sed ab ipsius ingenio & modestia adolescentis. Vnū etiam reliquum est com-

mune

mune gymnasticæ & musicæ agitandi corporis artificium, quod in choreis situm est, & in ipsa arte studioq; ad fidium sonitum tibiarium uel saltandi. In quo ipso tamen musice priores partes obtinet, ad quam, quoniam de gymnastica satis est dictum, eis coloribus quos probauit antiquitas in puerorum animis depingendam iam transeamus. P A V. Quàm uereor, ne hoc quicquid ego didici musices, ex eo genere sit, quod tibi minus probandum esse uideatur, quâquam ego iamdudum ab illo propè desueui, & ut tu uidere potes, minus minusq; eo quotidie delector, & ad hanc grauiorem & nobiliorem musicen, quam conspícor in poëtis, libentius me dedo, quæ animum meum illis numeris & dignitate ac grauitate sententiarum propè in cœlum rapit. I A C. Quod didicisti Paule de uocibus & tonis (sic enim uos appellatis) aut tollendis in acutum, aut rursus in graue deprimendis, itemq; de certis, falsisq; uoculis, nec non de eo quantum integer tonus, quantum dimidiatus pendat, quæ sit in diapason uis, quæ in diapente, qui gradus uocum numeriç & ipsorum inter

se permutationes, quæ cui uoci cum uoce
quaque consonantia, & si qua sunt talia
musici ludî documenta, non inficiabor ea
abs te & rite & necessario percepta esse.
Sed harum rerum cognitio est non diffici-
lis : illud uidendum, ne malo usu ars sine
dubio ad hominis naturam imprimis ac-
commodata, si corrupta ea sit, mores de-
inde quoque & animos nostros ipsa cor-
rumpat : etenim nihil est profecto ad obli-
gandum & comprehendendum animum
numero potentius, nec quod se magis illi
insinuet, aut normam legemq; præscribat,
quemadmodum eum uelit moueri & affi-
ci : declarat hoc tacita ipsa sæpe lectio ora-
torum & poetarum, quando in utrisque
numerus modiç sunt, & mensuræ inter-
uallaç uerborum, & si in poetis id multo
est expressius : sed tamen hos cum legi-
mus, sentimus non intus affici, & qua nu-
merosa illa uis sese inferat, cum hac unà
ferri, & in omnem partem pertrahi sensus
nostros. Quod si uox cantusque accedat
illi compositioni accommodatus & con-
gruens, uix ullum animi robur obstiterit,
quin det manus, & se ducendum tanquàm

addictum

addictum præbeat. Quid ergo est? quod plus in hoc genere est actionis & uirium; hoc magis prouidendum erat, quod tamen nequaquam sit, ut ne cuique liberum esset, quemadmodum quisque uellet musicę modos & uariare & flectere, sed statis quibusdam & publice probatis omnes cogerentur uti: quod quidem antiquitus Lacedæmone usque eò seuerè fuit obseruatum, ut Timotheum Citharcedum nobilem imprimis magno concursu artem Spartę proficientem, quod chordam unam addidisset in cithara, tanquàm soluentem leges, & labefactantem iuuenum disciplinam, illa ciuitas exterminandum curauerit. Quod si quæratur qui modus sit in musicis tenendus, hæc ego omnia attendenda esse puto: cum constet chorus ex tribus, sententia, rythmo (hic enim numerus nobis est) & uoce, primum quidem omnium & potissimum sententiám esse, utpote quæ sit sedes & fundamentum reliquorum, & per se ipsa ualeat nõ minimum ad suadendum animo uel dissuadendum: numeris, autem modisq; contorta penetret multò acrius: si uerò etiam cantu & uoce fuerit modus

lata, iam omnis intus sensus & hominem totum possideat. Videndum est igitur acute uel ciuitati, si quæ forte aliquando publicè huius rei susceperit curam, uel privato ciui, qui bene & pudice erudiendi filij certe sit curiosus, ita ut addiscatur hæc ars, ut quod subiectum materiesq; est artis, uerba uidelicet & sententiæ, ex genere eo sint, quod ad optimos cōseruandos alendosq; mores ualeat plurimum: quod idoneè fiet, si aut laudes clarorum uirorum, eorum ue dicta & pronūciata ad uirtutem pertinentia, aut diuinæ res, & de Deo ipso ea prædicabuntur, quæ habent illius bonitatis, benignitatis, clementiæq; commemorationem, cum maxima nostra utilitate beneficijsq; coniunctam: cuiusmodi primum scripsit in originibus Cato, usurpatum fuisse apud ueteres Romanos, ut post epulas ad tibiā fortium uirorum laudes, & præclara in patriam merita canerentur: altero interdum utuntur poëtæ, ut apud Virgilium Iopas, de sole, & luna, & cœlestibus rebus illic canens: apud nos uerò sublimius multò atque sanctius, qui sacris numeris diuinæ potestatis, & erga nos be-

neficien

neficientiæ myſteria cecinerunt : quod &
 nuper muſis omnibus approbantibus fe-
 cit homo ingenio & eloquentia & Chri-
 ſtiana pietate in omni poëtica facultate
 præſtans Actius Syncerus : hac quidem
 baſi ſuppoſita & collocata, adhibēdus iam
 deinceps numerus eſt; qui nequaquàm po-
 terit profecto fluidus eſſe, & mollis, & in-
 conſtans, ſi dignitatem illius ſententię apte
 debeat modulari : ſed habebit ſuauitatem
 auſteram & uirilem neceſſariò, grauesq̃
 conſectabitur modos; non enim aut natu-
 ra ipſa fert, aut noſtra poteſt pati expecta-
 tio, ut factum egregium Mutij Scauriæ ſi
 quis narrādo aſtringat, numeris celeribus
 id iambis debeat euoluere : feſtinationis
 enim & auuiditatis, & turbati iratiq̃ animi
 pedes illi ſunt, non cōſtantis inuictæq̃ uir-
 tutis : neque item deuotio illa Deciorum,
 & in mediòs hoſtes procurſus, cū ſe illi
 pro patriæ ſalute ad certam proiecere mor-
 tem, mollibus elegis aut fluentibus dithi-
 rambis uinciendus eſt; ſed heroum quærit
 carmen, ut dignitatem rerum par nume-
 rus conſequatur: Porro ſententia & nume-
 ro conſonantibus non poterit uox illis ſo-

lidum & uirile tenentibus ipsa infracta & muliebris esse, qui iam erit concentus non solum ad bonos mores & disciplinam utilis, sed etiam, ut mea fert opinio, iocunditate ipsa, & amœnitate longe superior: nō enim dulci quodam uelutī decocto satieta tem cito afferet, & sensus fastidio abalienabit, sed suauitatem autoritate condiens tenebit diutius, atque in adolescentium animis insinuans præclarum illud foedus honestatis cum uoluptate, quod caput esse bonorum morum diximus; idoneum erit id & conciliare in animo, & conseruare. Hanc ego musicam & tibi Paule & omnibus adolescentibus; qui uirtutis uolunt esse studiosi, & sectandam cupide, & firmiter cōprehendendam præcipio: quanquā tu quidem nostra monita tuo studio antecedis. Nam ista quæ nunc uulgò & passim celebris est musica, quid habere in se potest recti ac decori, quæ aut nulla uerborum fermè & sententiarum sede suffulta sit; aut si etiam habeat subiectam aliquam sententiam, illius tamen sensum ac notionem concise fractis ac uibratis inter fauces uocibus infuscet & impediat; quasi uerò

iccirco

iccirco reperta musica sit, non quæ mul-
 ceat temperetq; animos, sed quæ auribus
 tantum deferuiat & imitetur uolucrum ac
 bestiarum cantus, quarum tamen similes
 esse nollemus: at hoc est corporeum ani-
 mum efficere, & minime compotem sui: à
 quo iure optimo cum abhorreret Plato,
 huic esse tali in sua ciuitate noluit locum:
 nanque ubi molles, infractæ, uoluptariæq;
 sententiæ paribus numeris, & simili uocum
 modulamine proferuntur, uel ad libidines
 fluxæ, uel in doloribus languentes, uel ad
 subitos turbidi animi motus præcipites,
 & concitatæ, quam tu ibi labem uirtutis,
 quam bonorum morū uastitatem fieri pu-
 tas? Et nimirum hoc modo primum pri-
 stinum suum morem rectum & laudabi-
 lem corrumpit Græcia theatris & scenis ni-
 mirum frequentandis, chorisq; illis impi-
 mis adsciscendis, qui suauitate aures, ani-
 mos autem maxime affectionibus uarijs
 permouissent: inde in urbem Romam de-
 uecta illa pernicies, neruos antiquæ graui-
 tatis perfregit, & discidit: nostra autem hac
 ætate quid sperari debeat boni ex huiusce
 modi musica, promptum est cognoscere,

cum

cum uideamus quibus moribus sint hi, qui
eam tradunt & profitentur. Quamobrem
non illa hæc est digna homine libero, sed
quã paulo ante protulimus, laudabili sen-
tentia, grauib; numeris, uoce uirili ad stu-
dium uirtutis animum accendentem: cui
si adiungatur præterea motus agitatioq;
corporis ad sonum numerumq; conuersa,
iam saltatio exoritur, & choreæ ipsæ, qua-
rum nos usum non penitus interdicimus
adolescentiæ, rarò modo illæ & sobriè ex-
erceantur: non inutiles erunt exhilaran-
dis animis, & ex studiorum labore & con-
tracta illa cura reficiendis: uerùm missas
eas facere celeriter oportet, & saltationem
totam deserere: mature enim fit inepta, ne-
que potest cum grauitate uirili, sedationi-
busq; moribus ullo pacto in unum locum
tempusq; cõuenire: paulatim deinde quo-
que cantus & uocis modulatio relinquen-
da est, ut ne utamur ea ipsi, non ut ne au-
diamus utenteis alios. Nam auditio cui-
cunque ætati concessa sanè sit, etiam sene-
ctæ, & ultimæ, dum modice fiat, neque ni-
mis dedita opera expetatur. Rhythmos
quidem & sententias numeris astrictas ex
illo

illo genere graui, siue in legendis poëtis, siue in carminibus interdum etiam pangendis, omnis uitæ comites uolumus esse, habent enim amœnum iuxta atque opportunum à seuerioribus sæpe studijs & publicis curis occupationibusq; diuersoriũ.

P A V. Percepi planè mi pater, & quid tu adsciscas, probesq; in musicis, & quid repellas; dabo operam igitur ut tibi in utroque ac ueritati ipsi satisfaciam.

I A C. Ne Arithmetica quidem Paule non aduocanda est in cæterarum consortium disciplinarum, quæ est ipsa ars & scientia numerandi; cuius usus ita nobis necessarius est, ut uideamur absque ea ne quot digitos quidem habeamus in manibus, aut quot oculis intueamur scire posse; quod ridicule uidetur accidisse priscis hominibus ante Palamedem, cuius hoc inuentum apud Troiam fuisse fertur; quo quidem tempore neq; Agamemnon tanti exercitus dux, neque is qui in consilijs excellere ab Homero dictus est Nestor, neque uerò Vlyses mortalium omnium uersutissimus, numerum earum nauium, quibus appulerunt ad Troiam, potuissent dicere. Sed fabulis

missis

mīssis, huius artis scientiā atque exercitatio adolescentibus tradenda est, quatenus quidem expedit; principia enim certè percipienda sunt, & introrsum nonnihil penetrandum, ut numerorum differentias, parīsque & imparis uim, ac ipsorum inter se multiplices ac uarios intelligamus nexus, responsusque prope mirabiles referentium certis interuallis & spatijs priores in numeris antecedentibus affectiones ac notas posteriorum semper numerorum, ac si quæ sunt alia eiusdem modi, quæ cum ingenua oblectatione noscendæ artis liberalissimæ, ad acuendum excitandumque ingeniū præcipue idonea sunt; mentemque præterea à corporeis abstrahunt rebus, & ad meliorem suimet usum conuertunt; ut sua uinixa, neque sensibilibus rerum diuerberata, cogitationibus in illa æterna & immobili ueritate intuenda firmitus hæere possit, id quod scientia hæc habet imprimis; est enim numerorum ea natura & uis, ut nullo aut minimo commercio cum fluxis rebus, & nunquam in eodem statu manentibus, implicata sit, sed tanquam pura & simplex, & sibi seposita uirgo, non adeuntium oculis,

nec

nec manibus, sed castis tantummodo mentibus attrectetur : quo etiam deterius sibi ex illa & suæ uitæ auspicium faciunt, qui illam eius partem, quæ in subducendis & colligendis summis posita est, quam rationcinatiuam appellamus, conferunt ad quæstum, neque emolumentum ex ea sibi met ipsis, sed arcæ & oculis suis appetunt : & si enim huic quoque ministerio appositæ est, non alio fini tamen recte usurpatur, quàm ut belli & domi bene gerat respub. & priuatæ quoque rationes ordine administrantur, quæ sine hoc studio teneri rite non queunt. Ac quæstus quidem ingenuis animis turpis semper & sordidus est: recta autem communis rei priuatæq; gubernatio sapientis hominis propria. Quid quod ab ista arte cæteris omnibus artibus, quas mathematicas uocamus, principia traduntur, nec sine hac illæ suum munus obire possunt: Quid enim sine notione numerorum Musica? Quid Geometria? Quid ipsa cœli & syderum speculatrix Astrologia potest efficere? Quæ cum artes ab hac arte numerum tanquàm animum acceperint, uestiunt deinde illum ipsæ, & de suo ali-

quid

quid quasi corpus adglutinant; ut uerbi causa unitati, qua nihil est in natura rerum simplicius, neque in seipsa contractius, & ab omni omnino aliena re absolutius, situm & positionem Geometria addit, Musica sonum, uisum etiam & motum adiungit Astrologia. Quid Geometriam, quibus uerbis honestabimus? cuius uis disciplinæ latius etiam permanat, & in omneis artes penitus opificiaq; humanæ uitæ diffusa est: cum enim puncti sit linearum, superficierum, figurarū tam in plano, quàm in solido scientia, certissimisq; nixa rationibus & fundamentis, nusquam labatur, nunquam titubet cum admirabiles præbet in tuenda ueritate animis uoluptates, tum omnibus apta rebus non solum atque appositae, uerum in primis etiam & maxime necessaria est: illud enim quod unum continet omnia quæ arte & manu effici solent, libratio ipsa & collocatio, & unius ad aliorum proportionem facta commensio Geometrica tota est: neq; starent tecta urbium & moenia, illaq; ampla & præclara operum monumenta, quæ in templis, theatris, fornicibusq; uetustis Romanæ urbis adhuc
conspici

conspicimus, non tanta admiratione nos afficerent, nisi geometricis fuissent elaborata mentionibus. Quid columnæ, porticusq;? Quid belli instrumenta, & machinæ? Quid fingendi, pingendi, & aut ex ære, aut ex marmore cudendi tantis opificum ingenijs nobilitata quondam & solis ingenuis permissa ars? ipsaq; tota nauigatio, & locorum, orarum, regionum, littorum ex geographia sumpta descriptio? agrorumq; dimensio, & aquarum deriuationes? ac denique, ne singula memorem, quicquid uel oculis spectabile & magnificum, uel ad usus uitæ commodum ac necessarium est, huius omne est artis & Geometricæ facultatis inuentum. Quanquàm quid nos manu facta recensemus, cum ipsa hæc cœlestia quæ supra nos, circumq; torquentur: quorum & species & utilitas nulla est oratione explicabilis, ipsaq; item leuis & grauis in inferiore mûdo & commutabili conexio librataq; paribus momentis æqualitas, qua diuersæ res, & plurimum inter se repugnantes, ita ligantur & uinciuntur unâ, ut cum se alternæ maxime fugiant,

fic maxime contineantur, ratione geometrica quidem, sed ea diuina, fabricata sint. Hanc tantam huius artis uim & potestatem cū intelligeret Archimedes, qui unus fuisse traditur in hac scientia longe omnibus præstans, dictitare solitus erat, confidere sese, si alter inuentus foret terrarum orbis, hunc posse ad illum applicare & adiungere: & sanè ea ille de se indicia perhibebat, ut non id loqui temerè, neque inaniter, & falsò gloriari uideretur: ponderum enim & mēsurarum rationes, quibus reguntur, dirigunturq; omnia, cum ex Geometria optime calleret, intelligebat earum uim non quotidianis modo his instrumentis subsidijsq; communis uitæ, sed maximis etiam uoluendis & moliendis rebus idoneam esse. Atque hic tantus uir, qui patriæ suæ obsessæ contra exercitus Romani uim, & maximi imperatoris uirtutem, propter Geometriæ & ponderum scientiam unus fuit auxilio, reprehensione tamen non caruit, quòd scientiam hoc ipso in primis nobilem, quòd à sensibus oculisq; remota, sola mentis ui intelligentiaq;
nitatur,

nitatur, quasi direpto honore produxisset in publicum; etenim apud illos eruditos academiæ pulueres, ubi ista quondam liberalius tractabantur, potior quædam & magis occulta expēdebatur huiusce artis uis, fructusq; petebatur alendis atque ornandis bonis ingenijs multò uberior, q non in oculis & admiratione uulgi, sed in ipsius ueri contemplatione artisq; speculamētis, quæ theoremata Græci uocant, positus esset, quæ perpetua serie aliud ex alio, tanquàm orta tractaq; sic subtiliter uere perspicueq; monstrantur ut illa cognoscendi suauitate cōtentus animus, nil amplius requirat: nec suæ tranquillissimæ uoluptati populari extrinsecus plausu uelit obstrepi.

P A V. Dñj immortales tot ne & tanta nobis cognoscenda esse præcipis, præsertim properantibus ad philosophiam: quæ uideantur singula unius ætatem hominis distingere facile posse: etsi tibi ego assentior, fateorq; debere omnia percipi, si etiam potis est, ad eamq; rem sane alacris animo sum: sed audio tamen sæpe permultos accusantes breuitatem hominū uitæ, & diffi-

cultatem, ac magnitudinem huiuscemodi artium uerbis exaggerantes, quasi earum finis nulla capi possit. Itaque habent illud Theophrasti identidem in ore, qui moriēs accusasse naturam dicitur, quæ brutis animalibus, uolucrisq; nonnullis per longa uiuendi spatia tribuisset, cum eorum nihil illa res interesset: hominem uerò qui esset ad intelligendum & contemplandum natus, tunc potissimum extingueret, cum is mente & ratione bene uti uix cœpisset: quorum de opinione quid sentias, itemq; ad philosophiam percipiendam quam precipue sectamur, ecquam in istis, quas commemorasti, artibus opportunitatem esse constituas, audire si placet sanè uelim.

I A C. Maximam Paule, ut tibi ad posterius tuum respōdeam prius: neque eam simplicem & uniusmodi, sed multis rationibus utilem & accommodatam: nam cum omnis cognitio & sciētia est liberalis, tum autem artes hæ, de quibus iamdudum loquimur, illius ipsius quam appetimus philosophiæ, tanquàm unius magni corporis quasi membra quædam sunt: quicquid

enim

enim in rerum naturis tractandis noscendisq̃, quocunque illæ è genere sint, & in illarum uero intuendo uersatur atque inhæret, totum sub ditione philosophiæ est, ac lumine illius, tanquàm ueritatis radio illustratur: porro in philosophiâ quædam sunt quæ cæterorum maxima præstantissimaq̃ habentur: qualis est de summo omnium bono cognitio, deq̃ eo quod summe est, quodq̃ cæteris causam ut sint præbet: & si qua sunt alia eiusdem modi naturæ illius eximiæ & principis cognata atque affinia: ad quæ intelligenda, quoniam in excelsissimo mentis loco posita sunt, per huiusmodi studia & disciplinas, tanquàm per cliuos gradusq̃ scanditur: multaq̃ adhibentur ex hisce ipsiis facultatibus mentem animumq̃ adminiculantia, & in sublime tolli adiuuantia: sine quibus labare atque errare ferme esset necesse; ut harum in hac quoque parte egregia artium opera utilisq̃ reperiatur: uerum illa palmaris, quod auocant animum à sensibus, ipsumq̃ docent, per semetipsum quæ consideranda sunt, ea seorsum à sensationum cor-

porearum strepitu, solum in semetipso con-
 siderare & cernere, quod est maxime cer-
 tum & proprium philosophi munus: nam
 cum naturas rerū omnium, & illud ipsum
 quod sunt, uel summouerit procul natura
 à conspectu nostro, uel quas etiam obtulit,
 & tradidit nobis penè contubernales, tan-
 tis eas tamen inuolucris contexerit, ut au-
 res, oculos, cæterosq; sensus permoueant
 modo, menti autem ipsi, conanti appre-
 hendere illud quod quidq; est, offundant
 tenebras; non fuit mediocris operæ, neque
 exigui laboris, facere animum ipsum sibi
 met uiam per mediam turbam, concursio-
 nemq; sensilium, & illud ipsum inuenire,
 quod quæque res una est, unum ipsum sci-
 licet idemq; semper, neque tempore ullo,
 neq; mutatione uariabile. Quod quoniam
 nullo pacto fieri potuit, nisi coercitis &
 reiectis sensibus, ac illis etiam imaginum
 similitudinibus, quæ ex sensationibus rerum
 exterarum introductæ in animum atque
 impressæ uolitant uagæ, contemplantiq;
 obstrepuunt, silere penitus iussis: idcirco
 ut quæq; ars sic se gerere animum, atque à
 sensibus

sensibus quoad potest discedere, redireq;
 in sese maxime docet, ita maxime ad phi-
 losophiam utilis ea, atque opportuna est;
 quod in his numerandi metiendiq; disci-
 plinis præcipuè licet cernere; illæ enim mē-
 ti ea tractanda cogitandaq; proponunt,
 quæ à motu, quæ à sensu, quæ à tempore,
 quæ à uarietate, à discrepantia, à contrarijs
 pulsionibus penitus remota alienaq; exis-
 stunt, perpetuamq; obtinent & immuta-
 bilem in se ipsis constantiam ac ueritatem;
 quæ cum sit familiaris philosophiæ facul-
 tas, mathematicæ istæ artes & scientiæ,
 uel quod animum sic erudiunt ut solus ad
 speculandum sua uiri & confidere con-
 suescat; uel quod ipsæ quoq; philosophiæ
 partes & membra quodam modo sunt, ad
 illam ipsam aspirantibus noscendæ quadam
 tenus, nec sine honore debito sunt præ-
 tereundæ. Nam quod magnitudo earum
 deterreat nonnullos, & desperare penè sibi
 cogat, non est hoc artis nec difficultatis ex
 arte, sed imbecillitatis, & desidiæ uitium;
 equidem nō eo inficias, esse in artibus ipsis
 non difficultatem mehercule, neque ope-

rositatem (ut ita loquar) abhorret enim res à natura uerbi, sed subtilitatem potius, & abstrusionem quandam rerum intelligibiliū, nequaquā expositam populo, nec patentem hebetibus tardisq; ingenijs, quæ tamen acutorum, & ualentium ingeniorum aciem non effugiat, quo illa paruo ductu exiguaq; monstrazione intenta tam facile tamq; celeriter penetrant, non ut alienas & inhospitas peragrarè regiones, sed uti in suo regno dominari uideantur: est enim permagna hominum ingenijs innata uis, in quibus illa hominibus ab natura bene locata & constituta sunt: atq; ita magna, ut neque numero rerum, quas concipiunt, apprehendunt que, uincantur, neque amplitudine & mole opprimantur, nec tenuitate acumineq; frustrentur. Sed quemadmodum oculi, quibus à natura uergeti & perspicaces sunt traditi, facili leniq; conuersu in quam se cunq; dederint partem, celeriter omnia & sine labore quæ uolunt contuentur: Sic mens bene instituta & subornata à natura ad omnia comprehendenda in quæ intenderit est perspicax.

An si

An si hoc esset difficile, tantopere plurium artium scientia & copijs se instruere, tot olim è scholis Græciæ doctissimi homines prodijissent; illamq; magnificam & gloriosam (ut tum quidem uidebatur) promulgassent uocem, sese paratos esse omnibus quacunque de re quis quæreret statim respondere. Quod primus fecisse traditur Leontinus Gorgias; cui quidem ob eam rem tanti honores à communi Græcia habiti sunt, ut ex omnibus uni non inaurata Delphis, sed aurea statua collocaretur: quæ tamen nouæ ostentationis professio principio in admiratione habita, postea turba & multitudine idem faciētium, profitentiumq; euiluit: atque alij tamen suo ingenio & studio ostentando artium istarum, quas liberales dicimus, & bonarum literarum regionibus se tenuerunt. Hippias uerò qui in olympiorum celebritate totius Græciæ multo maxima non solum ingenuas omneis disciplinas callere sese, earumq; idoneum cuiuis autorem & magistrum se fore professus sit, sed palàm audiente Græcia, etiam annulum quem in

digito haberet, soccos quibus indutus, pal-
 lium quo amictus esset, ab sese factos &
 fabricatos gloriatus est, non ne declarat
 nullam esse artem quæ effugere hominis
 ingenium aciemque possit? quanquam iste
 quidem fortassis nugator, & ceteri cum il-
 la gloria non ferendi. Ad illos te reuoco,
 qui summam uim & gloriam perfectæ sa-
 pientiae sine ulla ostentatione cōsecuti sunt.
 An tu putas quicquam fuisse in rerum na-
 tura, aut in ullius artis scientia, quod aut
 amplitudinem, prudentiamque Platonis, aut
 acumen ingeniumque Aristotelis, aut uber-
 tatem Theophrasti, aut Polemonis, Ar-
 cesilæ, Chrysippi, Carneadis copiam dili-
 gentiamque præterierit? quanquam horum
 quidem talium & multitudine & gloria re-
 dundauit uetus Græcia, ut singulos nomi-
 nare non sit necesse. Nostri in hoc gene-
 re infrequentiores, quod accidit fortunæ
 uitio. Vix enim aperto ad philosophiam
 aditu, primus M. Varro ueterum omnium
 doctissimus, deinde flumen illud aureum
 eloquentiae Cicero eo se immiserat, Roma-
 naque ingenia secum pertrahebat, cum re-
 pente

pentè commutato reipub. statu, barbari &
 mores & literæ silentium optimis artibus
 indixere. Sed ut ab illis antiquis seculis
 ad nostra tempora deueniamus: non te pu-
 to arbitrari eum quem maxime miraris,
 quem semper in manibus habes, quem as-
 sidue legis, Petrum Bembum, sine multarum
 disciplinarum cognitione & scientia
 ad tam eximiam laudem eloquentiæ to-
 tiusq; sapientiæ peruenire potuisse: in quo
 quidem homine maximum est ornamen-
 tum ætati nostræ constitutum, & mihi sin-
 gularis ex eo lætitia, quando nos inter nos
 sanctissimo fœdere amicitiae iam inde ab
 adolescentia coniuncti, nihil germanis fra-
 tribus in amore mutuo concedimus. Quid
 de Hieronymo Aleandro? Quid de Desi-
 derio Erasmo dicam, hominibus doctissimis
 & omnium artium ac doctrinarum co-
 gnitione, usu, memoriaq; celebratissimis?
 Quid de Andrea Alciato nostro? ac ne lon-
 gius abeas: tuus Paule Gregorius Lilius,
 cuius tu primo cum patre tuo etiam dum
 cum esses, autoritate & diligentia bonis li-
 teris imbutus es: non ne complurium do-
 ctrinarum

trinarum scientiam sine difficultate tanta
 affecutus est? Nam is quo cū ipse assidue
 uiuit, quem nos quoque admirari soliti su-
 mus, uir clarissimus & nobilissimus Ioan.
 Franciscus Picus, cuius tandem scientiæ
 aut disciplinæ expers ulli unquā uisus est:
 qui cum haberet domesticum exemplum
 quod imitaretur, hominis omniū in omni
 uirtute & doctrina maximi, Ioannis Pici
 patruī sui, suo ingenio diligentiaq; perfe-
 cit, ut non illum desiderare iam mortuum,
 sed eum in huius ipsius eodem sanguine
 procreati, doctrina & moribus recognos-
 cere possimus. Verum ne sit infinitum nu-
 merare omnes, qui studio acri atque inge-
 nio præditi in pluribus artibus facultati-
 busq; uiguerunt, sic in præsentia conclu-
 damus. Cum hæc quæ in ingenuis & præ-
 clarissimis artibus posita sunt, habeant quā-
 dam in dissimilibus generibus, consimi-
 lem tamen ad quærendum & inuestigan-
 dum uiam, per quā tanquā uno eodemq;
 spiritu omnia contineantur: facile patere
 ea bonis & acutis & uigilantibus ingenijs,
 ijsq; ad comprehendendum parata expo-
 sitaq;

sitaque esse : tardis autem, atque hebetibus, & imbecillitate desidiaque corruptis apparere difficilima, uerissime ut dictum esse uideatur, aut cito ea percipi, aut nunquam : quod non uarietatis in illis, neque artium difficultatis, sed ingeniorum & uoluntatum omne sit discrimen. Nec si qui extiterunt, extantque quotidie, qui singularē aliquam ex his artem cum sibi tractandam cognoscendamque proposuissent, omnem suā aetatem in ea consumpserunt, id sanē mirandum est: quod idem potest contingere nauigantibus, ut cum sibi portum aliquem proposuerint, quo uelint proficisci, capti fortē inter nauigandum alicuius loci amoenitate, dimisso pristino cursu, resideant ibidem, & sua omnia componant : properantibus quidē ad philosophiam, ut tu modō dixisti, in qua est portus nostris fortunis constitutus, hęc tanquā diuersoria capienda sunt, cōmorandumque in his quoad expedit, & cognitioni satis sit, quæ hactenus esse debet, ut locorum situm & mores, cultusque hominum non tanquā ciuis & incolæ, sed ut curiosus uiator inspexisse uideare

deare: ut cum eodem fortasse redeundum tibi fuerit, non itineris monstrator quærendus, sed notum & familiare hospitium sit ineundum. Sic in disciplinis & artibus cæteris, per quas gradimur tēdimusq; ad philosophiam, ipsa artium principia & fundamenta cognoscenda sunt, capitaq; illa rerū è quibus omnis postea ad singulas tractandas & confirmandas res argumentatio ducitur, percipienda penitus, & in memoria sunt constituenda: aliquæ etiam singulares noscendæ quæstiones, neq; omnes tamen, quæcunque in illa arte colligi & concludi possunt: id enim iam infinitum est, & in quo cōplures uiri boni tempus omne suū atq; ocium disposuere, capti illecebra desidiosa cuiusdam delectationis: parit enim ex sese semper aliquid atque gignit ipsa in unaquaq; arte assidua uolutatio, quod cū uoluptate contemplare, dum res cunctas minutatim obire uult, quæ sub illius artis cadunt notionem: nec modū sibi facit, nisi is se euoluat & explicet qui quemadmodum Vlysses maiore uī ad se eñciendū nixus est, quàm ut ad Sirenarum cantus possit adhuc

sit adhærescere. Illud possum ego confir-
 mare & polliceri audacter, si quis per has-
 ce facultates & disciplinas contenderit ad
 philosophiam, & illarum cognitione do-
 ctrinaq; mediocri nō tam instructus quā
 imbutus, huic omnium scientiarum domi-
 næ totū sese dediderit, fore uti postea cum
 usus acciderit, ad illarum unam quācunq;
 rediens, & aliquid in ea nosse tractareq; in-
 stituēs, multo id & facilius agat & melius,
 quā si expertus philosophiæ in illius unius
 studio ætatem totam contriuisset; reuerte-
 tur enim ex opibus copijsq; philosophiæ
 & animo & ingenio multo paratior. PAV.
 Iam intelligo mi pater & facilitatem illam
 quam dicis, & modum, & ordinem quem
 tenendum putas, prorsusq; ita agi oportere
 persuasus sum. Sed quod sæpius iam mihi
 te loquente accidit, ut amore quodā fer-
 rer ad philosophiam, eo nunc uehementius
 me inflammari sentio, quod nihil usquā
 præclarum neque appetendum esse uideo,
 quod non ex illa, aut propter illam sit. Ec-
 quis igitur mihi ille erit dies, cum in tanti
 possessione boni Deorum immortalium
 summo

summo, & tuo pater beneficio positū esse me cognoscam? I A C. Et breue est quod tibi uiā etiam nunc restat, & omnia futura sunt tuo isti animo facilima; ac moralis quidem philosophiæ initia iam attigisti, ad summas autem & altissimas philosophiæ partes ac rationes certa semita est, qua ego te deducam, cū curriculum hoc confeceris, quod tamen totum penè percucurristi: cæteris enim liberalibus disciplinis à te perceptis, Geometriæ aliquantum plus & Astrologiæ quoque studiū ac temporis est impendendum; quod tamen utrunq; una ætas effecerit, atque ita ut omnia è Græcis scriptoribus petas, quando latina perturbatius scripta sunt. Et quoniam de Astrologia adhuc nihil diximus, ne ea quidem silentio uidetur prætereunda esse, quæ est cœlestium non tam naturarum & corporū (id enim philosophiæ munus est) quàm motuum illorum tot atque tantorum, & diurnarum ac nocturnarum cōcursionum circuitionumq; tam in uniuersis globis cōtinentibus omnia, quàm in ipsis stellis sideribusq; scientia; cuius non omneis partes, neq;

tes, neq; singula articulatim membra nosse
 necesse est, nisi si quis illam artē uelit pro-
 fiteri: scire quidem quantum satis est, ad
 philosophiam tendentibus, & quod in fa-
 cultatis illius principijs consistit addisce-
 re, certe humanum est. Quis enim est tam
 agresti animo, & tam auersus aureis suas
 ab ipsa uoce naturæ, qui non spectaculo
 & contemplatione tantorum luminum, ad
 aliquam eorum considerationem mouea-
 tur? aut qui non studeat nosse locum in
 quo siti sumus, medius, infimus, an sum-
 mus ille sit; ortus quoq; signorum & obis-
 tus, solisq; & lunæ, & cæterorum errantium
 conuersiones, tum dispares inter se, tum
 suis tamen unam quanque spatijs & tem-
 poribus solennes atque statas: astrorum
 quoque ipsorum unius ad aliud accessus,
 & plerunq; antecessus, subitos etiā inter-
 dum recessus: defectus item (ut poëta in-
 quit) Solis uarios, Lunæq; labores, Cur
 tantum oceano properent se tingere soles
 Hyberni, uel quæ tardis mora noctibus
 obstat, & cætera eiusdem modi, quæ qui

philosophiam ſedem percipiant, ſed ut homines eſſe exultimentur magnopere eſt illis elaborandum. P A V. Vere ita eſt, nam ſi orta eſt ex admiratione cura cognoscendi & percipiendi, ut te ſæpe audio loqui, nihil eſt profecto rerum iſtarum quæ in cœlo ſunt contemplatione admirabilius. I A C. Hoc quidem curſu Paule confecto (quoniam ad tuæ ætatis ſpatia iam acceſſimus, nihil enim tibi, aut paulum quiddam adhuc deeſt ex his quæ ſupra dicta ſunt) intrandum demum eſt in philoſophiæ campos latos atq; patentes, eoſdemq; feraces & frugiferos rerum omnium, quarum ad alendam beatiffimam uitam uſus eſſe aliquis atque opportunitas poteſt; quod nos quidem facere in te cœpimus, qui te admouimus ad Ariſtoteliſ Ethica; qua ex lectione intelliges quæ tibi in moribus recta atque ingenua ſunt, uſu & diſciplina comparata, non ipſam uirtutem eſſe, ſed ſimulacrum imaginemq; uirtutis; cui tamen, ut alio loco diximus, ſpiritus atq; animam philoſophia infuſura, & ſimulacrum exanime ac mutum, uitale ſimul ac uocale effectura eſt.

Verum

Verum huic philosophiæ studio dialecticâ esse adiunctam oportet, quam eandem & logicâ appellamus: cuius artis partē eam, in qua de figuris & modis argumentandi traditur, iam pridem te docuimus, quarum ipse argumentationum multis iam rebus usum utilitatēq; cognosti: sed restant multa atque ardua, quæ si intractata imperceptaq; sint, labare mentem nostram in maximis inuestigandis rebus fermè sit necesse: est enim certa quædam uia & persubtilis ratio explorandi in unoquoq; genere quo de quæratur aliquid, quid sit illius generis cognatum imprimis & proprium, unde ad concludendum & demonstrandum firmissime res argumentationesq; ducantur, quod hoc enucleatius scire, nosseq; oportet, q̃ infinitæ penè sunt aptæ ad fallendum & in se quidē ipsæ longe alienæ à uero, sed ueritamen similitudinē præ se ferentes rationes: quæ non imbutos modò mediocriter, sed sæpe homines doctissimos eruditissimosq; peruertunt, stantesq; deſciunt, & cir

possit obfisti. Sed quoniā & hæc ipsa quæ nunc de dialectica dicimus & totam illius uim & potestatem paulò post in ipsis Aristotelis libris nobis monstrantibus cogniturus es, non attinet plura loqui, nisi id tantum monere & præcipere, quoniam in ipso iam limine philosophiæ constitutus es, ut optimos autores scientiæ præstantissimæ, tibi semper legendos uoluitandosq; proponas; Platonem imprimis, & Aristotelem: quorum quidem duorum cœlestibus ingenijs admirabiliq; scientia, iure se omnibus gentibus anteponebat Græcia, tum autem Græcos potissimum interpretes: nam hos qui latinam scriptionem professi, barbara omnia, pollutaq; reddiderunt, & inquinatis literis, præposterisq; quæstionibus, magnas offuderunt philosophiæ tenebras, magnopere tibi uitandos & fugiēdos esse sentio; nihil enim afferunt ingenui neq; recti: sed cum uerā ignorent philosophiæ uim, & rationes nothas, quas Cræci sophismata uocant, pro legitimis & ueris rationibus consecantur, ad clamandum quidem & litigandum ualde robusti sunt, in doctrina
uero,

uerò, & in ipsa sapiētia prorsus sunt imbecilles: qui etiam uanitate quadam ingenij ignorātiāq; inducti, in eis rebus populi aucupantur famam, quarum eos rerum maxime pudere oporteret: sed horum turba ineptijsq; reiectis, tu Paule sic philosophiam amplexator, ut eam intelligas artem esse bene beateq; uiuendi: nec intelligendi solum, sed etiam agendi, faciendiq; magistrā: hæc tibi constantiam & firmitatem in bonis moribus allatura est; hæc copiam & ubertatem pulcherrimarum rerum ac sentētiarum orationi tuæ suppeditabit; hæc te optimis instituet & consilijs & uoluntatibus, fideiq; tibi erit & officij & integritatis semper magistra: hæc efficiet ut illud excelsum & erectum & liberū in animo, in quo inest dignitas, nunquam cedat fortunæ, non secundis ullis rebus, nō aduersis permoueat. Quod si qui huc peruecti & uberibus philosophiæ aliquandiu aliti, ad alia uitæ studia deinde se conuerterint, siue ius civile uoluerint exequi, siue reipub. curam do

scipiuntur, sciant illi ad quam se cunq; de-
derint partem, & facilitatis multò plus in
assequendo, & in agendo prudentiæ atque
industriæ esse secum delaturos. Qui uerò
in philosophia perpetuum uitæ suæ domi-
cilium constituerint, eos Dei potius simi-
les, quàm ex communi hominum more ac
natura iudicandos esse. Quorum quidem
de numero te imprimis cupio esse Paule,
ut tua ad uirtutem indoles, nostrumq; de-
sideriũ optimo ac præclarissimo fini
terminetur. Egoq; qui nullos
refugio ut te erudiã & in-
stituã labores, hac po-
tissimum in te
posteritatis
spe con-
sola-
tioneq;
sustenter.

F I N I S.

